

|      |   |   |   |
|------|---|---|---|
| 漢書門類 |   |   |   |
| 一    | 二 | 三 | 四 |
| 〇    | 一 | 七 | 〇 |
| 冊    | 架 | 函 | 號 |

|      |   |
|------|---|
| 內閣文庫 |   |
| 三    | 四 |
| 〇    | 〇 |
| 八    | 五 |
| 冊    | 架 |
| 函    | 號 |

|      |           |
|------|-----------|
| 內閣文庫 |           |
| 番號   | 漢 4420    |
| 冊數   | 105( 23 ) |
| 函號   | 281 21    |



宋史卷一百十

禮志第六十三

開府儀同三司上柱國錄軍國重事前中書丞相監樞密院事都總裁脫脫等脩

皇明朝列大夫國子監祭酒臣方從哲

承德郎右春坊右中允管國子監司業專臣黃汝良等奉

勅重較刊

皇明朝列大夫國子監祭酒臣吳士元

承德郎同業仍加俸一級臣黃錦等奉

禮十五

嘉禮

上尊號儀 高宗內禪儀

上皇太后皇太妃冊寶儀

舊史以飲食婚冠賓射饗宴脈膳慶賀之禮為嘉禮又以歲時朝會養老宣赦拜表臨軒命官附之今依政和禮分朝會為賓禮餘如其舊云

尊號之典唐始載於禮官宋每大祀羣臣詣東上閣門拜表請上尊號或三上或五上多謙抑弗許如允所請卽奏命大臣撰冊文及書冊寶其受冊多用祀禮畢自御正殿行禮禮畢有司以冊寶詣閣門奉進入內建隆四年羣臣三上表上尊號詔俟郊畢受冊前三日遣官奏告天地宗廟社稷遂爲定制其儀有司宿設崇元殿仗衛文武百官並集朝堂之次攝太尉奉冊於案吏部侍郎一員押司徒奉寶於案禮部侍郎一員押以五品六品清資官充舉冊舉寶官皆承之以匣覆之以帊俱詣殿門外之東太尉之前大樂令帥工人入就位諸侍

衛官及宰執兩制供奉官等立於殿階下香案前左右如常入閣儀侍中奏中嚴外辦所司承旨索扇扇上皇帝袞冕御輿出自西房樂作卽御坐扇開樂止符寶郎奉表如常儀禮直官通事舍人分引太尉以下文武羣官應北面位者各就橫行位太常卿於冊案前導至丹墀西階上少東北面置訖太尉司徒吏部禮部侍郎各入本班立定典儀贊白官再拜舞蹈三稱萬歲又再拜起居訖又再拜分班序立禮直官引太常卿隨行吏部侍郎押冊案以次序行太尉從之禮部侍郎次押寶案行司徒從之詣西階至解劔褥位其讀冊中書令讀寶

侍中候冊案將至先升於前楹間第一柱北對立太尉  
解劔脫烏訖吏部侍郎押冊案先升太尉從升當御坐  
前太尉搢笏北面奉冊案稍前跪置訖俛伏與少退東  
向立中書令進當冊案前讀冊訖俛伏興又搢笏奉冊  
於褥東向冊函北向進跪置御坐前與舉冊官降還侍  
立位太尉亦降納烏帶劔禮部侍郎押寶案升司徒隨  
升北面跪置侍中讀寶訖置冊之南俱復位其納烏帶  
劔俛伏一如上儀典儀贊在位官皆再拜禮直官通事  
舍人引太尉至西階下解劔烏升當御坐前跪賀

其詞中書

門下

賀訖復位皆再拜如讀冊寶儀侍中升至御坐前

承旨退臨階西向稱有制典儀贊再拜訖宣曰朕以鴻  
儀昭舉保命會昌迫於羣情祗膺顯號退循寡昧惕懼  
增深所賀知宣訖復位典儀贊再拜舞蹈三稱萬歲又  
再拜訖侍中升階奏禮畢降復位扇上樂作帝降坐御  
輿入自東房扇開樂止侍中版奏解嚴中書侍郎帥奉  
案官升殿跪奉冊置於案次門下侍郎奉寶如奉冊禮  
通事舍人贊引詣東上閣門狀進所司承旨放仗百官  
再拜訖退如常儀自後受冊皆如之禮畢賜百官食于  
朝堂熙寧元年宰臣曾公亮等上表請加尊號詔不允  
先是翰林學士司馬光言尊號起唐武后中宗之世遂

爲故事先帝治平二年辭尊號不受天下莫不稱頌聖德其後佞臣建言國家與契丹常有往來書彼有尊號而中國獨無足爲深恥於是羣臣復以非時上尊號論者甚爲朝廷惜之今羣臣以故事上尊號臣愚以爲陛下聰明睿智雖宜享有鴻名然踐祚未久又在亮陰之中考之事體似未宜受陛下誠能斷以聖意推而不居仍令更不得上表請則頌歎之聲將洋溢四海矣詔賜光曰覽卿來奏深諒忠誠朕方以頻日淫雨甲申地震天威彰著日虞傾禍被此鴻名有慙面目况在亮陰亦難當是盛典今已批降指揮可善爲答辭使中外知朕

至誠慙懼非欺衆邀名其後宰臣數上表請終不允徽宗內禪欽宗上尊號曰教主道君太上皇帝居龍德宮靖康元年正月朔朝賀畢車駕詣龍德宮賀百官班門外宰執進見如儀高宗內禪紹興三十二年六月十日御札皇太子可卽皇帝位朕稱太上皇帝退處德壽宮皇后稱太上皇后應軍國事並聽嗣君處分十一日行內禪之禮有司設仗紫宸殿宰臣文武百僚立班皇帝出宮鳴鞭禁衛諸班直親從儀仗并內侍省執骨朶使臣等並迎駕自贊常起居皇帝升御坐知闕門官以下并內侍都知御帶以下一班起居次管庫一班起居次

宰執以下常起居訖左僕射陳康伯知樞密院事葉義問參知政事汪澈同知樞密院事黃祖舜升殿奏曰臣等不才輔政累年罪戾山積乃蒙容貸不賜誅責今陛下超然獨斷高蹈堯舜之舉臣等心實欽仰但自此不獲日望清光犬馬之情不勝依戀因再拜辭相與泣下幾至號慟帝亦爲之流涕曰朕在位三十六年今老且病又欲閒退此事斷自朕心非由臣下開陳卿等當悉力以輔嗣君康伯等復奏曰皇太子仁聖天下所共知似聞謙遜太過未肯便御正殿帝曰朕前此固嘗與之言早來禁中又面諭之卽步行徑趨側殿門欲還東宮

已再三敦勉邀留今在殿後矣宰執降階皇帝降坐鳴鞭還內宰臣文武百僚並退立班聽宣詔訖再拜舞蹈三稱萬歲再拜訖班權退復追班入詣殿下立班少頃新皇帝服履袍涕泣出宮禁衛諸班直親從儀仗等迎駕起居鳴鞭內侍扶掖皇帝至御榻涕泣再三不坐內侍傳太上皇帝聖旨請皇帝升御坐皇帝升御坐東側坐知閣門官以下一班起居稱賀次管軍官一班起居稱賀次文武百僚橫行北向立舍人當殿文武百僚宰臣陳康伯以下起居稱賀皇帝降御坐側身西向不坐侯宰臣以下再拜舞蹈三稱萬歲起居稱賀畢康伯等

升殿奏臣等言願陛下卽御坐以正南面上副太上皇帝傳授之意帝愀然曰君父之命出於獨斷此大位懼不敢當尚容辭避康伯等再奏茲者伏遇皇帝陛下應天順人龍飛寶位第以駕下之材恐不足以仰輔新政然依乘風雲千載之遇實與四海蒼生不勝幸慶再拜賀畢奏事而退宰執下殿皇帝還內鳴鞭宰執文武百僚赴祥曦殿候太上皇帝登輦扈從至德壽宮而退翌日詣德壽宮朝見前期儀鸞司設大次于德壽宮門內小次于殿東廊西向其日俟皇帝出卽御坐從駕臣僚禁衛等起居如常儀皇帝降御坐乘輦至德壽宮東

武百僚詣宮門外迎駕起居訖前導官太常卿閣門官太常博士禮直官先入詣大次前分左右立定俟皇帝降輦入次御史臺閣門太常寺報文武百僚入詣殿庭北向立定前導官導皇帝入小次簾降俟太上皇帝卽御坐小次簾捲前導官導皇帝升殿東階詣殿上折檻前奏請拜皇帝再拜訖前導官導皇帝稍前躬奏聖躬萬福訖復位再拜訖導皇帝詣太上皇帝御坐之東西向立殿下在位官皆再拜搢笏三舞蹈三叩頭出笏就拜又再拜班首不離位奏聖躬萬福又再拜班退前導官以次退從駕官歸幕次以俟從駕太上皇帝駕與皇

帝從入見太上皇后如宮中之儀皇帝還內如來儀每  
遇正旦冬至及朔望並依上儀十二日帝詣德壽宮以  
雨百僚免入見上就宮中行禮自後詣宮若行宮中禮  
卽不集百官陪位十三日詔令宰臣率百官於初一日  
十六日詣德壽宮起居又詔朕欲每日一朝德壽宮脩  
晨昏之禮面奉慈訓恐廢萬機勞煩羣下不蒙賜許禮  
官宜重定其期如前代朝朔望甚爲踈闊朕不敢取於  
是禮部太常寺言漢書高皇帝五日一朝太上皇乞依  
此故事每五日一次詣德壽宮朝見如宮中禮帝始御  
後殿宰臣陳康伯等奏臣等朝德壽宮太上皇宣諭車

駕每至宮必於門外降輦已再三勉諭旣行家人之禮  
自宜至殿上降輦帝曰太上有旨不須五日一朝只朝  
朔望朕心未安宜令有司詳議如宮門降輦臣子禮所  
當然於是禮部太常言除朝朔望外乞於每月初八二  
十三日詣德壽宮起居如宮中儀自後皆遵此制如值  
雨盛暑祁寒臨期承太上特旨乃免十一月冬至上詣  
德壽宮稱賀上壽禮畢入見太后如宮中禮自後冬至  
並同隆興元年正月朔帝率百官詣德壽宮如冬至儀  
自後正旦並同乾道元年二月朔帝詣德壽宮恭請太  
上太后至延祥觀燒香太上與帝乘馬太后於後乘輿



次幸聚景園次幸玉津園自後帝詣德壽宮恭請太上  
太后至南內或幸延祥觀靈隱寺天竺寺恭進太上聖  
政冊命皇太子起居稱謝遇游幸則宰執以下從駕至  
游幸所除管軍環衛官等俟駕還護從還內宰執以下  
並免護從先退淳熙十六年孝宗內禪皇太子即皇帝  
位紹熙五年光宗內禪皇子嘉王即皇帝位並如紹興  
三十二年故事

太皇太后皇太后皇太妃冊禮建隆元年詔尊母南陽  
郡太夫人爲皇太后仍令所司追冊四親廟後不舉行  
至道三年四月尊太宗皇后李氏爲皇太后宰臣等詣

崇政殿門表賀皇帝又詣內東門表賀皇太后乾興元  
年真宗遺制尊皇后劉氏爲皇太后淑妃楊氏爲皇太  
妃亦不果行冊禮天聖二年宰臣王欽若等五表請上  
皇太后尊號十一月郊祀畢帝御大安殿受冊百官稱  
賀畢再序班侍中奏中嚴外辦禮儀使奏發冊寶帝服  
通天冠絳紗袍秉珪以出禮儀使閣門使導帝隨冊寶  
降自西階內臣奉至殿庭置橫街南東向褥位冊在北  
實在南帝立殿庭北向褥位奉冊寶官奉冊寶案太常  
卿吏部禮部侍郎引置當中褥位禮儀使奏請皇帝再  
拜在位官皆再拜太尉司徒就冊寶位帝指珪跪奉冊

授太尉又奉寶授司徒皆稽笏東向跪受興奉冊寶案置於近東西向褥位禮儀使奏請皇帝歸御幄易常服乘輿赴文德殿後幄百官班退赴朝堂太尉司徒奉冊寶至文德殿外幄太尉以下各就次以俟侍中奏中嚴外辦太后服儀天冠袞衣以出奏隆安之樂行障步障方團扇侍衛垂簾卽御坐南向樂止太常卿導冊案至殿西階下各歸班在位者皆再拜太尉押冊司徒奉冊中書令讀冊訖侍中押寶案司徒奉寶侍中讀畢太尉司徒詣香案前分班東西序立尚宮贊引皇帝詣皇太后坐前帝服鞞袍簾內行稱賀禮跪曰嗣皇帝臣某言

皇太后陛下顯崇徽號昭煥寰瀛伏惟與天同壽率土不勝欣忭俛伏興又再拜尚宮詣御坐承旨退西向稱皇太后答曰皇帝孝思至誠貫于天地受茲徽號感慰良深帝再拜尚宮引歸幄太尉率百官稱賀奏隆安之樂太后降坐還幄樂止侍中奏解嚴所司放仗百官再拜退太后還內內外命婦稱賀太后皇帝於內殿在外命婦及兩京留司官並奉表稱賀自是上皇太后尊號禮皆如之熙寧二年神宗尊皇太后曹氏爲太皇太后詣文德殿跪奉玉冊授攝太尉曾公亮金寶授攝司徒韓絳又跪奉皇太后高氏玉冊授攝太尉文彥博金寶

授攝司徒趙抃禮畢百官稱賀哲宗卽位詔尊太后高氏爲太皇太后皇后向氏爲皇太后德妃朱氏爲皇太妃禮部議皇太妃生日節序物色其冠服之屬如皇后例稱慈旨慶賀用箋太皇太后皇太后於皇太妃稱賜皇帝稱奉百官不稱臣皇帝問皇太妃起居用箋皇太妃答皇帝用書宰臣請特建太皇太后宮曰崇慶殿曰崇慶曰壽康皇太后宮曰隆祐殿曰隆祐曰慈徽元祐二年詔太皇太后受冊依章獻明肅皇后故事皇太后受冊依熙寧二年故事皇太妃與皇太后同日受冊命太常禮官詳定儀注古諫議大夫梁燾請對文德殿大

皇太后曰大臣欲行此禮予意謂必難行燾對曰誠如聖慮願堅執勿許且母后權同聽政蓋出一時不得已之事乞速罷之中書舍人曾肇亦言太皇太后聽政以來止於延和殿受遼使朝見亦止於御崇政殿未嘗踐外朝今皇帝述仁祖故事以極崇奉之禮太皇太后儻以此時特下明詔發揚皇帝孝敬之誠而固執謙德止於崇政殿受冊則皇帝之孝愈顯太皇太后之德愈尊兩義俱得顧不美歟太皇太后欣然納之迺詔將來受冊止於崇政殿尋以天旱權罷未幾太師文彥博等以時雨溥澍秋稼有望請舉行冊禮凡三請乃從九月六

日發太皇太后冊寶于大慶殿發皇太后太妃冊寶于文德殿行禮如儀紹聖元年詔奉太皇太后旨皇太妃特與立宮殿名坐六龍輿張繖出入由宣德正門有司請應宮中並依稱臣妾外命婦入內準此百官拜箋稱賀稱殿下徽宗卽位加哲宗太妃號曰聖瑞旣又御文德殿冊命元符皇后劉氏爲太后並依皇后禮制建炎元年五月冊元祐皇后爲隆祐太后令所司擇日奉上冊寶時方巡幸不克行禮遙尊韋賢妃爲宣和皇后紹興七年三月詔略曰宣和皇后夙擁慶羨是生眇冲迺骨肉之至親借父兄而時邁十年地阻懷陟岵凱風之

思萬里使還奉上皇寧德之諱宜尊爲皇太后令所司擇日奉上冊寶太常寺言請依祖宗故事俟三年之喪終制然後行禮時翰林學士朱震言唐德宗建中上太后沈氏尊號時沈太后莫知所在猶供張含元殿具衮冕出左序立東方再拜奉冊今太后聖體無恙信使相望豈可不舉揚前憲臣又聞三年之制惟天地社稷越紼行事德宗以大曆四年卽位明年改元建中時行易月之制故以冕服行事今陛下退朝之服盡如禮制謂當供張別殿遣三公奉冊藏于有司恭俟來歸願下禮官請明詔從之禮部太常言寶文欲乞以皇太后寶四

字爲文合差撰冊文官一員書冊文官一員書篆寶文  
官一員並差執政十年營建皇太后宮以慈寧爲名十  
二月帝自常御殿詣慈寧殿遙賀皇太后奉上册寶十  
二年八月皇太后還慈寧宮十月十八日奉進冊寶其  
日張設慈寧殿設坐殿中皇太后服禕衣卽御坐本殿  
官設冊寶於殿下慈寧宮事務官并本殿官並朝服詣  
殿下再拜措笏舉冊寶奉進先進冊次進寶進畢降坐  
易禕衣服常服皇帝詣慈寧殿賀如宮中儀次宰臣率  
百僚拜表稱賀三十二年六月詔上太上皇帝太上皇  
后尊號集議以聞左僕射陳康伯等言五帝之壽惟堯  
最高百王之典惟堯獨冠今茲高世之舉視堯有光恭  
請上太上皇帝尊號曰光堯壽聖太上皇帝太上皇后

尊號曰壽聖太上皇后詔恭依仍令禮部太常討論禮  
儀以聞左僕射陳康伯撰太上皇帝冊文兼禮儀使參  
政汪澈書冊文并篆寶知樞密院葉義問撰太上皇后  
冊文同知樞密院事黃祖舜書冊文八月十四日奉上  
册寶是日陪位文武百僚太傅以下行事官並朝服入  
詣大慶殿下立班皇帝自內服履袍入御幄服通天冠  
絳紗袍出至大慶殿詣冊寶褥位前再拜在位官皆再  
拜訖皇帝行發冊寶授太傅之禮如儀禮畢皇帝還幄

服履袍還內文武百僚退儀仗鼓吹備而護衛冊寶太

不作

傳以下行事官導從冊寶至德壽宮皇帝自祥曦殿服履袍乘輦至德壽宮大次降輦陪位文武官入殿庭立班定太傅以下行事官從冊寶入殿皇帝服通天冠絳紗袍升殿詣西向褥位立太上皇帝自宮服履袍卽坐皇帝北向四拜起居訖次太傅以下皆四拜起居次行奉冊之禮中書令參知政事史浩讀冊攝侍中葉義問讀寶讀訖退復位皇帝再拜稱賀曰皇帝臣某稽首言伏惟光堯壽聖太上皇帝陛下冊寶告成鴻名肇正與天同壽率土均懽皇帝再拜次侍中承旨宣答曰皇帝

孝通天地禮備古今勉受鴻名良深感慰皇帝再拜訖西向立次太傅以下再拜稱賀致詞曰攝太傅尚書左僕射臣康伯等稽首言伏惟光堯壽聖太上皇帝陛下肅臨寶位誕受丕稱獨推天父之尊普慰帝臣之願奏訖再拜舞蹈次侍中承旨宣答曰光堯壽聖太上皇帝聖旨倦勤滋久佚老是圖勉受嘉名但增感慰又再拜舞蹈次太上皇帝降坐入宮皇帝後從壽聖太上皇后冊寶入宮皇帝詣太上皇后坐前北向立太上皇后升坐皇帝四拜起居行奉上冊寶之禮讀冊官陳子常讀冊寶官梁康民讀寶讀訖復位皇帝再拜稱賀致詞曰

皇史卷一百一十一  
禮崇大號寶書翁受歡抃無彊皇帝再拜次宣答官承旨宣答曰壽聖太上皇后教旨皇帝稜容載藏顯號來膺誠孝通天但深感惕皇帝再拜訖太上皇后降坐入宮次太傅以下文武百僚就德壽殿下拜牋稱賀以俟皇帝服履袍乘輦還內十六日宰臣率文武百僚詣文德殿拜表稱賀

宋史卷一百一十終

宋史卷一百一十一

禮志第六十四

開府儀同三司上柱國錄軍國重事前中書右丞相監樞密院事都總裁殿學士

皇明朝列大夫國子監祭酒臣方從哲

承德郎右春坊右中允管國子監司業事臣黃汝良等奉

勅重較刊

皇明朝列大夫國子監祭酒臣吳士元

承德郎司業仍加俸一級臣黃錦等奉

禮十四 嘉禮二

冊立皇后儀

冊皇太子妃儀

冊命親王大臣儀

冊命皇太子儀

公注受封儀

冊立皇后建隆元年立瑯邪郡夫人王氏為皇后命所司擇日備禮冊命自後凡制書云冊命者多不行冊禮

后妃皆寫冊命告身以金花龍鳳羅紙金塗襍袋有司  
進入學士院草制宣於正殿近臣牧守宗室皆脩貢禮  
羣臣拜表稱賀又詣內東門奉牋賀皇后真宗冊德妃  
劉氏爲皇后不欲令藩臣貢賀不降制於外廷止命學  
士草詞付中書仁宗冊皇后曹氏其冊制如皇太子玉  
用珉玉五十簡匣依冊之長短實用金方一寸五分高  
一寸其文曰皇后之寶盤螭紐綬并緣冊寶法物約舊  
制爲之匣蓋並朱漆金塗銀裝其禮與通禮異不立仗  
不設縣前一日守宮設次於朝堂設冊寶使副次於東  
門外命婦次於受冊寶殿門外設皇后受冊寶位於殿  
庭階下北向奉禮設冊寶使位於內東門外副使內侍  
位於其南差退東向北上冊寶案位於使前南向又設  
內給事位於北廂南向其日百官常服早入次禮直官  
通事舍人先引中書令侍中門下侍郎中書侍郎及奉  
冊寶官執事人絳衣介幘詣垂拱殿門就次以俟冊降  
禮直官通事舍人分引宰臣樞密冊寶使副百官詣文  
德殿立班東西相向內侍二員自內承旨降皇后冊寶  
出垂拱殿奉冊寶官俱搢笏率執事人禮直官導中書  
侍郎押冊中書令後從門下侍郎押寶侍中後從由東  
上閣門出至文德殿庭權置禮直官通事舍人引使副



就位次引侍中於使前西向稱有制典儀曰再拜贊者承傳使副在位官皆再拜宣曰贈尚書令冀王曹彬孫女冊爲皇后命公等持節展禮使副再拜侍中還位門下侍郎帥主節者詣使東北主節以節授門下侍郎門下侍郎執節授冊使跪受興付主節幡隨節立於使左次引中書令侍中詣冊寶東北西向立中書侍郎引冊案立於中書令右中書令取冊授冊寶使冊寶使跪受興置於案中書令中書侍郎退復班門下侍郎引寶案於侍中之右取寶授冊寶使如上儀退復位典儀贊拜訖禮直官通事舍人引使副押冊寶持節者前導

奉冊寶官奉昇授衛如式以次出朝堂門詣內東門附內臣入進內臣引內外命婦入就位內侍詣閣請皇后服禕衣冊寶至使副俱東向內給事前北向跪稱冊寶使李迪副使王隨奉制授皇后冊寶俛伏興退復位內給事入詣受冊寶殿門皇后前跪奏訖內侍進詣使前西面跪受冊寶以授內謁者監使退復位內謁者監主當內臣持冊寶入內東門內侍從之以次入詣殿庭內侍贊引皇后降立庭中北向位內侍跪取冊次內侍跪取寶興立皇后右少前西向內侍二員進立皇后左少前東向內侍稱有制內侍贊皇后再拜內侍奉冊進授

皇后皇后受以授內侍次內侍奉寶亦然復贊再拜訖  
導皇后升坐內臣引內外命婦稱賀如常儀禮畢內侍  
導皇后降坐內臣還閣內外命婦班退皇后易常服謝  
皇帝皇太后用常禮百官詣東上閣門表賀元祐五年  
八月太皇太后詔以皇帝納后今翰林學士御史中丞  
兩省與太常禮官檢詳古今六禮沿革參考通禮典故  
具爲成式羣臣又議勘昏御史中丞鄭雍等請不用陰  
陽之說呂大防亦言不可太后納之六年八月三省樞  
密院言六禮命史納采問名納吉納成告期差執政官  
攝太尉充使侍從官或判宗正官攝宗正卿充副使以  
舊尚書省權爲皇后行第納采問名同日次日納吉納  
成告期納成用穀圭爲贊不用鴈請期依開寶禮改爲  
告期親迎爲命使奉迎納采前擇日告天地宗廟皇帝  
臨軒發冊同日先遣冊禮使副次遣奉迎使令文武百  
官詣行第班迎又言據開元禮納采問名合用一使納  
吉納成各別日遣使今未委三禮共遣一使或各遣使  
又合依發冊例立仗詔各遣使文德殿發制依發冊立  
仗七年正月詔尚書左丞蘇頌撰冊文并書學士院上  
六禮辭語其納采制文略曰太皇太后曰咨某官封姓  
名渾元資始肇經人倫爰及夫婦以奉天地宗廟社稷

謀于公卿咸以爲宜率由舊典今遣使持節太尉某宗  
正卿某以禮納采其答文曰太皇太后嘉命訪婚陋族  
備數采擇臣之女未閑教訓衣履若而人欽承舊章肅  
奉典制某官封糞土臣姓某稽首再拜承制詔問名制  
曰兩儀合德萬物之統以聽內治必咨令族重宣舊典  
今遣使持節某官以禮問名答曰使者重宣中制問臣  
名族臣女夫婦所生先臣故某官之遺微孫先臣故某  
官之遺曾孫先臣故某官之遺孫先臣故某官之外孫  
女年若干欽承舊章肅奉典制納吉制曰人謀龜筮同  
符元吉恭順典禮今使某官以禮納吉答曰使者重宣  
中制臣陋族卑鄙憂懼不堪欽承舊章肅奉典制納成  
制曰咨某官某之女孝友恭儉實維母儀宜奉宗廟永  
承天祚以黝纁轂圭六馬以章典禮今使某官以禮納  
成答曰使者重宣中制降婚卑陋崇以上公寵以豐禮  
備物典策欽承舊章肅奉典制告期制曰謀于公卿大  
筮元龜罔有不臧吉日惟某月某甲子可迎率遵典禮  
今遣某官以禮告期答曰使者重宣中制以某月某甲  
子吉日告期臣欽承舊章肅奉典制奉迎制曰禮之大  
體欽順重正其期維吉典圖是若今遣某官以禮奉迎  
答曰使者重宣中制今日吉辰備禮以迎螻蟻之族猥

承大禮憂懼戰悸欽率舊章肅奉典制餘如式三月禮部太常寺上納后儀注發六禮制書太皇太后御崇慶殿內外命婦立班行禮畢內給事中出殿門置六禮制書案上出內東門禮直官通事舍人引由宣祐門至文德殿後門入權置案於東上閣門命使納采問名文德殿宰臣親王執政官宗室百僚大小使臣易朝服樂備而不作班定內給事奉制書案置橫街北稍東西向北上禮直官通事舍人引門下中書侍郎次引使副就橫街南承制位北向東上內給事詣使者東北面稱太皇太后有制典儀曰再拜在位官皆再拜宣制曰皇帝納后命公等持節行禮典儀曰再拜使副皆再拜授制書訖典儀曰再拜在位官皆再拜禮直官通事舍人太常博士引使副從制案出載於油絡網攢車出宣德門鼓吹備而不作至皇后行第大門外令史二人對奉制案立主人立大門內僮者立主人之左北面進受命出曰敢請事使者曰某奉制納采僮者入告主人曰某之女若而人既蒙制訪臣某不敢辭僮者出告人引主人出大門外再拜使者先入使者曰太皇太后制主人再拜宣制書畢主人再拜受訖主人進表訖再拜使者出問名同上儀使者曰將加卜筮奉制問名主人曰臣某之

女若而人既蒙制命臣某不敢辭命使納吉納成告期並同命使納采問名儀納吉使者曰請加卜筮占曰從制使某納吉主人曰臣某之女若而人龜筮云吉臣預有馬臣某謹奉典制告期使者曰某奉制告期主人曰臣某謹奉典制以上納吉納成告期請見授制接表並如納采儀臨軒命使冊后及奉迎於文德殿百官朝服皇帝常服乘輦至殿後閣侍中奏中嚴外辦乃服通天冠絳紗袍乘輦出自西房降輦卽御坐兩省官及侍制權侍郎觀察使以上分東西入殿門各就位東西相向立奉寶置御坐前奉宣后冊由東上閣門出至文德殿庭橫行典儀曰拜在位官皆再拜使副受冊宣制曰冊某氏爲皇后命公等持節展禮典儀曰拜使副再拜受冊寶訖典儀贊百官再拜宣制曰太皇太后制命公等持節奉迎皇后典儀贊使副再拜受節又贊百官再拜侍中奏禮畢解嚴百官再拜出皇帝常服還內冊寶至皇后行第如納采儀使者曰某奉制授皇后備物典冊迎百官常服班宣德門外行第儂者請使者曰某奉制以禮奉迎儂者入告主人曰臣某謹奉典制儂者出告入引主人出大門外再拜使者先入曰有制主人再拜

使者宣制畢主人再拜受制答表又再拜姆導皇后尚  
宅前引升堂出立房外典儀贊使副再拜使者曰今日  
吉日某等承制以禮奉迎內侍受以入使副退主人以  
書授使者奉於司言受以奏聞皇后降立堂下再拜訖  
升堂主人升自東階西向曰戒之戒之夙夜無違命主  
人退母進西階上東向施衿結帨曰勉之戒之夙夜無  
違命皇后升輿至中門升車出大門使副及羣臣前引  
將至宣德門百官宗室班迎再拜訖分班皇后入門鳴  
鐘鼓班迎官退迺降車入次升輿入端禮門文德殿東  
上閣門出文德殿後門入至內東門內降輿司輿前導  
詣福寧殿門大次以俟哺後皇后車入宣德門侍中版  
奏請中嚴內侍轉奏皇帝服通天冠絳紗袍御福寧殿  
尚宮引皇后出次詣殿庭之東西向立尚儀跪奏外辦  
請皇帝絳坐禮迎尚宮前引詣庭中之西東面揖皇后  
以入導升西階入室各就榻前立尚食跪奏具皇帝揖  
皇后皆坐尚食進饌食三飯尚食進酒受爵飲尚食以  
饌從再飲如初三飲用卮如再飲尚儀跪奏禮畢俱興  
尚宮請皇帝御常服尚寢請皇后釋禮服入幄次日以  
禮朝見太皇太后皇太后參皇太妃如宮中之儀詔從  
之四月太皇太后手書曰皇帝年長中宮未建歷選諸

臣之家以故侍衛親軍馬軍都虞候贈太尉孟元孫女  
爲皇后制詔六禮尚書左僕射兼門下侍郎呂大防攝  
太尉充奉迎使同知樞密院事韓忠彥攝司徒副之尚  
書左丞蘇頌攝大尉充發冊使簽書樞密院事王巖叟  
攝司徒副之尚書左丞蘇轍攝太尉充告期使皇叔祖  
同知大宗正事宗景攝太宗正卿副之皇伯祖判大宗  
正事高密郡王宗晟攝太尉充納成使翰林學士范百  
祿攝宗正卿副之吏部尚書王存攝太尉充納吉使權  
戶部尚書劉奉世攝宗正卿副之翰林學士梁燾攝太  
尉充納采問名使御史中丞鄭雍攝宗正卿副之五月  
甲午行納采問名禮丁酉行納吉納成告期禮戊戌帝  
御文德殿發冊及命使奉迎皇后巳亥百官表賀于東  
上閣門次詣內東門賀太皇太后又上牋賀皇后上牋  
賀皇太妃皇后擇日詣景靈宮行廟見禮大觀四年冊  
貴妃鄭氏爲皇后議禮局重定儀注臨軒冊使皇帝御  
文德殿服通天冠絳紗袍百官朝服陳黃麾細仗依古  
用宮架冊使出殿門依近儀不乘輅權以穆清殿爲受  
冊殿其日皇后服褱衣其奉冊寶授皇后皆用內侍受  
冊訖皇后上表謝皇帝內外命婦立班稱賀羣臣入殿  
賀皇帝於內東門上牋賀皇后其上禮儀注乞依進馬

條令施行其會羣臣及皇后會外命婦儀注並依開元  
開寶禮受冊之殿陳宮架用女工升降行止並以樂節  
而別定樂名樂章皇后上表乞免受冊排黃麾仗及乘  
重翟車陳小架鹵簿等而於延福宮受冊其朝謁景靈  
宮亦止依近例云紹興十三年閏四月十七日冊貴妃  
吳氏爲皇后前期於文德殿內設東西房東西閣凡香  
案宮架冊寶幄次舉麾位押案位權置冊寶褥位受制  
承制宣制位奉節位贊者位奉冊寶位舉冊舉寶官位  
及文武百僚應行事官執事官位皆儀鸞司太常典儀  
分設之以俟臨軒發冊其日質明皇帝服通天冠絳紗  
袍出西閣協律郎舉麾奏乾安之樂皇帝降輦卽御坐  
樂止冊使副以下應在位官皆再拜侍中宣制曰冊貴  
妃吳氏爲皇后令公等持節展禮冊使副再拜參知政  
事以節授冊使冊使跪受以授掌節者中書令以冊授  
冊使侍中以寶授副使並權置于案冊使副以下應在  
位官皆再拜冊使押冊副使押寶持節者前導正安之  
樂作出文德殿門樂止至穆清殿門外幄次權置以俟  
皇后首飾禕衣出閣協律郎舉麾坤安之樂作皇后至  
殿上中間南向立定樂止冊使副就內給事前東向跪  
稱冊使副姓某奉制授皇后備禮典冊內給事入詣皇



后前北向奏訖冊使舉冊授內侍內侍轉授內謁者監副使舉寶授內侍內侍轉授內謁者監掌節者以節授掌節內侍內侍持節前導冊寶并案進行入詣殿庭冊寶初入門宜安之樂作至位樂止皇后降自東階至庭中北向位初行承安之樂作至位樂止皇后再拜舉冊官搢笏跪舉冊讀冊官搢笏跪宣冊內謁者監奉冊進授皇后皇后受以授司言又奉寶進授皇后皇后受以授司寶司言司寶置冊寶于案舉冊寶官并舉案官俱搢笏舉冊寶并案興詣東階之東西向位置定皇后初受冊寶成安之樂作受訖樂止皇后再拜禮畢

冊皇太子至道元年八月壬辰詔立皇太子命有司草具冊禮以翰林學士宋白爲冊皇太子禮儀使有司言前代太子無執圭之文請如王公之制執桓圭餘如舊制九月丁卯太宗御朝元殿陳列如元會儀帝袞冕設黃麾仗及宮縣之樂於庭百官就位太子常服乘馬就朝元門外幄次易遠遊冠朱明衣所司贊引三師三少導從至殿庭位再拜起居畢分班立太常博士引攝中書令就西階解劔履升殿詣御坐前俛伏興奏宣制降就劔履位由東階至太子位東南向稱有制太子再拜中書侍郎引冊案就太子東中書令北面跪讀冊畢太

子再拜受冊以授右庶子門下侍郎進寶授中書令中書令授太子太子以授右庶子各置於案由黃道出太子隨案南行樂奏正安之曲至殿門樂止太尉升殿稱賀侍中宣制答如儀皇太子易服乘馬還宮百官賜食於朝堂中書門下樞密院師保而下詣太子參賀皆序立於宮門之外庶子版奏外備內臣褰簾太子常服出次坐中書門下文武百官樞密師保賓客而下再拜並答拜四品以下官參賀升坐受之越三日具鹵簿謁太廟常服乘馬出東華門升輅儀仗內行事官乘車者並服禮衣餘皆袴褶乘馬導從有司言唐禮宮臣參賀皆舞蹈開元始罷之故事百官及東宮接見祇呼皇太子上牋啓稱皇太子殿下百官稱名宮官稱臣常行用左春坊印宮中行令又按唐制凡東宮處分論事之書太子並畫令左右庶子以下署名姓宣奉行書按畫日其與親友師傅不用此制今請如開元之制宮臣止稱臣不行舞蹈之禮今皇太子兼判開封府其所上表狀卽署太子之位其當申中書樞密院祇判官等署餘斷案及處分公事並畫諾詔惟改諾爲準餘並從之其朝皇后儀止用宮中常禮時真宗以壽王爲皇太子兼判開封請見僚屬稱名而免稱臣神宗未及受冊禮而卽位

乃以冊寶送天章閣遂爲故事紹興三十二年五月詔曰朕以不德躬履艱難三十有六年憂勞萬機宵旰靡怠屬時多故未能雍容釋負退養壽康今邊鄙粗寧可遂如志皇子毓德允成神器有託朕心庶幾可立爲皇太子仍改名所司擇日備禮冊命未及行禮六月十一日內禪乾道元年八月十日制立皇子鄧王愔爲皇太子十月詔以知樞密院洪适爲禮儀使撰冊文簽書樞密院事葉顥書冊工部侍郎王弗篆寶十六日皇帝御大慶殿行冊禮皇太子服遠遊冠朱明衣執桓圭前期習禮儀官及有司並先一日入宿衛展宮架樂設太子

次冊寶幄次百官次又設皇太子受冊位典寶褥位應行禮等皆有位列黃麾半仗於殿門內外質明百官就次皇太子常服詣幕次符寶郎陳八寶於御位之左右有司奉冊寶至幄次百官朝服入班殿庭有司自幄次奉冊寶至褥位參知政事中書令導從退各就位侍中升殿俟宣制皇太子易服執圭俟於殿門外樂正撞黃鐘之鐘乾安之樂作皇帝卽御坐殿上侍臣起居樂止行禮官贊引皇太子入就殿庭東宮守從初入殿門明妾之樂作樂上皇太子起居次百官起居各拜舞如儀皇太子詣受冊位侍中前承旨降階宣制曰冊鄧王愔

爲皇太子皇太子拜舞如儀侍中升殿復位中書令詣  
讀冊位捧冊官奉冊至中書令跪讀畢興皇太子再拜  
有司奉冊至皇太子位中書令跪以冊授皇太子皇太  
子跪受以授右庶子置於案次侍中以寶授皇太子皇  
太子跪受以授左庶子如上儀皇太子再拜中書舍人  
押冊中允押寶以出次皇太子出於來儀初行樂作出  
殿門樂止次百官稱賀樂正撞蕤賓之鐘乾安之樂作  
皇帝降坐樂止放仗在位官再拜以出禮畢百官易常  
服赴內東門司拜牋賀皇后次赴德壽宮拜表牋賀諸  
路監司守臣等並奉表稱賀明日車駕詣德壽宮謝又

明日上御紫宸殿引皇太子稱謝還東宮百官赴東宮  
參賀皇太子擇日先朝謁景靈宮次日朝謁太廟別廟  
又擇日詣德壽宮稱謝先是禮官言皇太子朝謁景靈  
宮無所服典故乞止用常服次朝謁太廟別廟當袞冕  
乘金輅設仗從之皇太子言乘輅設仗雖有至道天禧  
故事非臣子所安詔免

冊皇太子妃政和五年三月詔選皇太子妃六年六月  
詔選少傅恩平郡王朱伯材女爲皇太子妃令所司備  
禮冊命庚辰帝服通天冠絳紗袍御文德殿發冊先是  
議禮局上五禮新儀皇太子納妃乘金輅親迎皇太子

三奏辭乘輅及臨軒冊命詔免乘輅而發冊如禮焉  
公主受封降制有冊命之文多不行禮惟以綸告進內  
至嘉祐二年封福康公主爲堯國公主始備禮冊命前  
一日百官班文德殿內降冊印宣制冊案授衛一如冊  
皇后儀有司先設冊仗等幕於內東門外命婦次公主  
本位門之外公主受冊印位於本位庭階下北向冊使  
位於內東門副使及內給事於其南差退並東向設冊  
印案位於冊使前南向內給事位於冊使北南向自文  
德殿奉冊印將至內東門內給事詣本位請公主服首  
飾揄翟冊印至內東門外褥位置訖內臣引內命婦入  
就位禮直官引冊使副等俱就東向位內給事就南向  
位通事舍人博士引冊使就內給事前東向躬稱冊使  
某副使某奉制授公主冊印退後位內給事入詣所設  
受冊印位公主前言訖退內給事進詣冊使前西向冊  
使跪以冊印授內給事內給事跪授內謁者內謁者及  
主當內臣等持入內東門內給事從入詣本位贊公主  
降詣庭中北向立跪取冊興立公主右少前西向又內  
給事立公主左少前東向稱有制贊者曰拜公主再拜  
右給事奉冊跪授之公主受以授左給事右給事又奉  
印授公主如上儀贊者曰拜公主再拜畢引公主升位

次內臣引內命婦賀畢遂引公主謝皇帝皇后一如內中之儀羣臣進名賀其冊印如貴妃有匣文曰堯國公主之印遂爲定制神宗進封邠國大長公主魯國公主皆請免冊禮止進告入內云

冊命親王大臣之制具開寶通禮雖制書有備禮冊命之文多上表辭免而未嘗行每命親王宰臣使相樞密使西京留守節度使並翰林草制夜中進入翼日自內置於箱黃門二人舁之立御坐東內朝退內奉箱出殿門外宣付閣門降置於案俟文德殿立班閣門使引制案置於庭宣付中書門下宰相跪受復位以授通事舍

人赴宣制位唱名訖奉詣宰相宰相受之付所司若立后妃封親王公主卽先稱有制百官再拜宣制訖復再拜舞蹈稱賀若宰相加恩制書卽宣付通事舍人引宰相於宣制石東北向再拜立聽訖拜舞復位若百官受制卽自班中引出聽麻文班於宣制石東武班於西並如宰相儀聽訖出赴朝堂其罷相者卽引出赴朝堂金吾仗舍諸王宰相朝謝前一日內降官告從內出東上閣門外宣詞以賜授節者仍交旌節授者俛伏執旌節交於頸上者三參知政事宣徽使樞密使大兩省兩制祕書監上將軍觀察使以上授官告敕牒者皆拜教舞

踏若止授敕或宣頭者止再拜餘官悉不拜敕不舞蹈  
惟御史大夫中丞拜授東上閤門使又引至殿門外中  
籠門再拜親王節度使相官告並載以綵輿迎歸第親  
王輿中設銀師子香合輦官十二人並僕頭緋繡寬衣  
旌節各二馬四爆稍官十六人執旌節攏馬對引由乾  
元門西偏門出至門外馬技騎士五十人搶牌步兵六  
十人教坊樂工六十五人及百戲蹴鞠鬪鷄角觝次第  
迎引左右軍巡使具軍容前導至本宮使相輿中用銀  
香鑪輦官十二人金鷲帽錦絡縫紫純寬衣旌節各一  
馬二爆稍官八人馬技騎士二十人搶牌步兵二十四  
人軍巡使不前導餘如親王制有故則罷凡諫舍刺史  
以上在外任加恩者悉令其親屬乘傳齎詔就以告牒  
賜之政和禮局上冊命親王大臣儀乞不果行

宋史卷一百一十一終

宋史卷一百一十二

禮志第六十五

開府儀同三司柱國錄軍國重事前書左相兼同國史領經筵事都總裁脫脫等脩

皇明朝列大夫國子監祭酒臣方從哲

承德郎右春坊右中允管國子監司業黃才良等奉

勅重較刊皇明朝列大夫國子監祭酒臣吳元

肯重修承德郎司業仍加俸一級臣黃錦等奉

禮十五 嘉禮三

聖節 諸慶節

聖節建隆元年羣臣請以二月十六日為長春節正月十七日於大相國寺建道場以祝壽至日上壽退百僚詣寺行香尋詔今後長春節及諸慶節常參官致仕官

萬曆二十七年刊

宋史卷一百一十二

禮志

一



僧道百姓等毋得進奉太宗以十月七日爲乾明節復改爲壽寧節真宗以十二月二日爲承天節其儀帝先御長春殿諸王上壽次樞密使副宣徽三司使次使相次管軍節度使兩使留後觀察使次節度使至觀察使次皇親任觀察使以下各上壽仍以金酒器銀馬袖表爲獻旣畢咸赴崇德殿序班宰相率百官上壽賜酒三行皆用教坊樂賜衣一襲文武羣臣方鎮州軍皆有貢禮前一月百官內職牧伯各就佛寺脩齋祝壽罷日以香賜之仍各設位賜上尊酒及諸果百官兼賜教坊樂景德二年始令樞密三司使副學士復赴百官齋會少

卿監刺史以上及近職一子賜恩贈道則賜紫衣師號禁屠輟刑仁宗以四月十四日爲乾元節正月八日皇太后爲長寧節詔定長寧節上壽儀太后垂簾崇政殿百官及契丹使班庭下宰臣以下進奉上壽閣門使於殿上簾外立侍百官再拜宰臣升殿跪進酒簾外內臣跪承以入宰臣奏曰長寧節臣等不勝歡忭謹上千萬歲壽復降再拜三稱萬歲內臣承旨宣曰得公等壽酒與公等同喜咸再拜宰臣升殿內侍出簾外跪授虛醴宰臣跪受降再拜舞蹈三稱萬歲內侍承旨宣羣臣升殿再拜升陳進奉物當殿廷通事舍人稱宰臣以下進

奉客省使殿上喝進奉出內謁者監進第一醖賜酒三  
行侍中奏禮畢皆再拜舞蹈太后還內百官詣內東門  
拜表稱賀其外命婦舊入內者卽入內上壽不入內者  
進表內侍引內命婦上壽次引外命婦如百官儀次日  
大宴英宗以正月三日爲壽聖節禮官奏故事聖節上  
壽親王樞密於長春殿宰臣百官於崇德殿天聖諒闇  
皆於崇政殿於是紫宸上壽羣臣升殿間飲獻一觴而  
退又一日賜宴於錫慶院神宗以熙寧元年四月十日  
爲同天節以宅憂罷上壽惟拜表稱賀明年親王樞密  
使管軍駙馬諸司使副詣垂拱殿宰臣百官大國使詣

紫宸殿上壽命坐賜酒三行不舉樂明年以大旱罷同  
天節上壽羣臣赴東上閤門表賀中書門下言同天節  
上壽班自今樞密使副宣徽三司使殿前馬步軍副都  
指揮使以上共作一班進酒一醖親王宗室使相至觀  
察駙馬管軍觀察使以上皆赴紫宸殿依本班序立上  
壽更不赴垂拱殿蓋以管軍觀察使以上及親王駙馬  
並於垂拱殿以官序高下各班進酒畢而日晏外朝有  
班者仍詣紫宸殿議者以爲近瀆改焉而詔袒免以上  
宗婦聽班賀于禁中哲宗卽位詔以太皇太后七月十  
六日爲坤成節宰臣請以十二月八日爲興龍節哲宗

本七日生以避僖祖忌故後一日徽宗以十月十日為  
天寧節定上壽儀皇帝御垂拱殿羣臣通班起居畢分  
班從義郎以下醫官待詔等先退知引進司官一員讀  
奏目知東上閣門官一員奏進壽酒由東階升舍人通  
教坊使以下贊再拜奏聖躬萬福又再拜復位次看醴  
人稍前舍人贊再拜上殿祇候分東西兩階立候進酒  
升殿次舍人引親王入殿庭北向立贊再拜班首奏萬  
福舍人引進奉西入列於親王後酒器檐床置馬前揖  
天武躬奏萬福造奉馬先出內侍進御茶床殿中監酌  
酒訖知東上閣門官殿上躬奏親王某以下進壽酒舍  
人揖親王以下躬贊再拜乃引親王二員升殿知東上  
閣門官引詣御坐前舍人東階下西向立後準此尚醴典  
御奉槃醴授班首搯笏受槃醴西向立奉御啓醴親王  
一員搯笏注酒班首奉詣御坐東進訖少退虛跪與以  
槃授典御退閣門引降階舍人引當殿北向立東上贊  
拜興搯笏跪奉表舍人接表一員在東餘詣親王西置  
表笏上授引進知引進司官殿上讀奏目退親王以下  
俛伏與躬舍人贊再拜引班首升東階餘殿下分立閣  
門引詣御坐東北向搯笏尚醴典御如前奉槃立樂作  
皇帝飲訖受醴復位再拜如上儀知引進司官詣折檻

東西向宣曰進奉收贊拜舞蹈又再拜西出親王以下  
赴紫宸殿立班引進官宣進奉出天武奉進奉以出閣  
門復立殿上教坊使贊送御酒又再拜教坊致語訖贊  
再拜退次樞密官上壽次管軍觀察以上上壽進奉並  
如儀內侍舉御茶床舍人贊教坊使以下謝祇應再拜  
訖閣門側奏無公事皇帝赴紫宸殿後閣受羣臣上壽  
質明三公以下百僚並於殿門外就次東上閣門御史  
臺太常寺分引入詣殿庭東西立閣門附內侍進班齊  
牌皇帝出閣禁衛諸班親從迎駕自贊帝起居皇帝升  
坐鳴鞭禮直官通事舍人引三公至執政官御史臺東

上閣門分引百官並橫行北向立典儀贊再拜舞蹈班  
首奏萬福又再拜訖分東西立禮直官引殿中監少監  
升東階詣酒尊所稍西南向西上立舍人揖教坊使以  
下通班太起居次首醜人謝升殿贊再拜內侍進御茶  
床殿侍酌酒訖禮直官通事舍人分引三公至執政官  
御史臺東上閣門分引百僚並橫行北向立典儀贊再  
拜贊者承傳在位官皆再拜禮直官通事舍人引上公  
升東階東上閣門官接引升殿授醜啓醜如上儀上公  
詣御坐俛伏跪奏文武百僚上公具官臣某等稽首言  
天寧令節臣等不勝大慶謹上千萬歲壽俛伏興退降

階舍人接引復位典儀贊再拜訖禮直官引知樞密院  
官詣御坐前承旨退詣折檻稍東西向宣曰得公等壽  
酒與公等內外同慶典儀贊拜如儀百官分東西立禮  
直官通事舍人引上公升東階東上閣門官接引詣御  
坐東揖笏殿中監授盤上公奉進御坐東北向樂作皇  
帝飲訖閣門引接醴降復位典儀贊拜如上儀宗室遙  
郡以下先退禮直官引樞密院官詣御坐前承旨退詣  
折檻稍東宣曰宣羣臣升殿典儀贊拜訖禮直官通事  
舍人分引三公以下升東階親王使相以下升西階御  
史臺東上閣門分引祕書監以下升兩朵殿并東西廊  
席後立尚醴典御以醴授殿中監奉御啓醴殿中監西  
向立殿中少監以酒注于醴第二第二奉詣御坐前躬進  
訖少退舉盤西向立樂作皇帝飲訖殿中監接醴退授  
奉御出笏復位通事舍人分引殿上官橫行北向舍人  
贊再拜典儀曰再拜贊者承傳皆再拜舍人贊就坐各  
立席後復受就坐羣官皆坐酒初行先宰臣次百官皆  
作樂尚食典御奉御進食太官設羣官食皇帝再舉酒  
羣官興立席後樂作飲訖舍人贊就坐再行羣官酒皇  
帝三舉酒並如第二之儀酒三行舍人曰可起羣官興  
立席後若宣示醴卽隨東上閣門官以下揖稱宣示醴

躬贊就坐若宣勸卽立席後躬飲訖贊再拜內侍舉御  
茶床禮直官引左輔詣御坐前北向俛伏跪奏左輔具  
官臣某言禮畢俛伏與退復位禮直官通事舍人分引  
三公以下文武百僚降階橫行北向立樞密院官在親  
王後典儀贊再拜皆舞蹈再拜退靖康元年四月十三  
日太宰徐處仁等表請爲乾龍節至日皇帝帥百官詣  
龍德宮上壽畢卽本宮賜侍從官以上宴建炎元年五  
月宰臣等上言請以五月二十一日爲天申節詔曰朕  
承祖宗遺澤獲託士民之上求所以扶危持顛之道未  
知攸濟念二聖鑿輿在遠萬民失業將士暴露夙夜痛  
悼寢食幾廢况以眇躬之故聞樂飲酒以自爲樂乎非  
惟深拂朕志實增感于朕心所有將來天申節百官上  
壽常禮可令寢罷至是止就佛寺啓散祝壽道場詣閣  
門或後殿拜表稱賀紹興十三年二月臣僚奏臣聞孝  
理天下者帝王之盛德歸美報上者臣子之至誠是皆  
因性自然發於觀感必各盡其至然後爲稱恭惟陛下  
撫艱難之運憂勤在御兢兢業業圖濟中興孝德通于  
神明皇天爲之悔禍長樂還闕適當誕節之前陛下以  
天下養獲伸宮闈上壽之儀臣民得於觀聽天下無不  
欣慶所以崇大養而成孝理之功者旣以盡善盡美矣

陛下誕聖佳辰乃臣子所願奉觴上壽以盡歸美之意其可不舉而行之乎臣愚欲望將來天申節許令有司舉行舊典至日百官得以奉萬年之觴仰祝聖壽天下幸甚太常禮部討論每遇聖節樞密院以下先詣垂拱殿上壽畢宰臣率百僚於紫宸殿上壽前一月分日啓建道場至前一日樞密院官滿散依例作齋筵至日三省官上壽立班訖次赴滿散作齋筵後二日大宴於集英殿時命御史臺太常寺脩立儀注孝宗隆興元年太上皇帝天申節皇帝及宰臣文武百僚詣德壽宮上壽是日以欽宗大祥前一日皇帝起居知宮中儀百僚拜表稱賀乾道八年立皇太子皇帝率皇太子及文武百僚詣德壽宮上壽前期儀鸞司陳設德壽宮殿門之內外設御坐於殿上當中南向設大次於德壽宮門內南向小次於殿東廊西向設皇帝褥位二一於御坐東南西向一於御坐之南北向尚醞設御酒尊酒器於御坐之東有司又設御茶床於御坐之西俱稍北其日文武百僚內不係從駕者並先赴德壽宮門外以俟迎駕起居質明皇帝服鞞袍出卽御坐從駕臣僚禁衛起居如常儀皇帝降坐乘輦將至德壽宮文武百僚迎駕再拜起居訖前導官太常卿閣門官太常博士禮直官先入

詣大次前分左右立定皇帝降輦入次御史臺開門太  
常寺分引皇太子并文武百僚入詣殿庭東西相向立  
定前導官導皇帝入小次簾降皇太子并文武百僚並  
橫行北向立太上皇帝出宮升御坐鳴鞭小次簾捲前  
導官導皇帝升殿東階詣殿折檻前北向褥位再拜躬  
奏聖躬萬福再拜皇帝詣太上皇帝御坐之東褥位西  
向立前導官於殿上隨地之宜立次舍人揖皇太子并  
文武百僚躬典儀曰再拜贊者承傳在位官皆再拜搢  
笏舞蹈又再拜皇太子不離位奏聖躬萬福各再拜直  
身分東西相向立禮直官引奉盤醴官受盤醴宣承旨  
宣答官奏禮畢 殿中監少監升殿內侍進御茶床尚  
醞典御以盤醴酒注授殿中監少監次禮直官引奉盤  
醴官詣尊所北向殿中監啓醴殿中少監注酒奉盤醴  
官奉酒詣皇帝前北向禮直官引受盤醴官詣太上皇  
帝御坐前西向立皇太子并文武百僚橫行北向立奉  
盤醴官躬進皇帝皇帝奉酒前導官導皇帝詣太上皇  
帝御坐前躬進訖少後以盤授盤醴官前導官導皇帝  
詣太上御坐前褥位北向俛伏跪殿下皇太子并百僚  
皆躬身皇帝奏臣某謹率文武百僚稽首言天申令節  
臣某與百僚等不勝大慶謹上千萬歲壽奏訖伏興再



拜在位官皆再拜承旨宣答官宣曰得皇帝壽酒與皇帝并百僚內外同慶皇帝再拜在位官皆再拜訖分東西相向立皇帝詣御坐東西向立奉盤醴官以盤北向恭進皇帝奉盤樂作俟太上皇帝飲酒皇帝躬接醴訖皇帝少後以盤醴授受盤醴官以授殿中監各復位立皇太子并文武百僚橫行北向皇帝詣褥位北向再拜在位官皆再拜皇帝詣太上御坐東褥位西向立皇太子文武百僚再拜搢笏舞蹈又再拜訖內侍舉茶床奏禮畢官北向俛伏跪奏具官臣某言禮畢在位官再拜太上皇帝駕興皇帝從入文武百僚以次退淳熙二年

十一月詔太上皇帝聖壽無疆新歲七十以十一日冬至加上尊號開寶十二月十七日立春行慶壽禮是日早文武百僚並簪花赴文德殿立班聽宣慶壽赦宣赦訖從駕至德壽宮行慶壽禮致詞曰皇帝臣某言天祐君親錫茲難老惟春之吉年德加新臣某與羣臣等不勝大慶謹上千萬歲壽餘與前上壽儀注同禮畢從駕官應奉宮禁衛等並簪花從駕還內文武百僚文德殿拜表稱賀十年十二月以太上皇后新年七十詔以立春日行慶賀之禮十三年春正月朔以太上皇帝聖壽八十帝率羣臣詣德壽宮行禮其儀注恩赦並如淳熙

二年典故孝宗以十月二十二日爲會慶節光宗以九月四日爲重明節寧宗以十月十九日爲天祐節尋改爲瑞慶節理宗以正月五日爲天基節度宗以四月九日爲乾會節瀛國公以九月二十八日爲天瑞節其上壽稱賀之禮大略皆如天申節儀

諸慶節古無是也真宗以後始有之大中祥符元年詔以正月三日天書降日爲天慶節休假五日兩京諸路州府軍監前七日建道場設醮斷屠宰節日士庶特令宴樂京師然燈又以六月六日爲天貺節京師斷屠宰百官行香上清宮又以七月一日聖祖降日爲先天節

十二月二十四日降延恩殿日爲降聖節休假宴樂並如天慶節中書親王節度樞密三司以下至駙馬都尉詣長春殿進金縷廷壽帶金絲續命縷上保生壽酒改御崇德殿賜百官飲如聖節儀前一日以金縷廷壽帶金塗銀結續命縷緋綵羅延壽帶綵絲續命縷分賜百官節日戴以入禮畢宴百官於錫慶院天禧初詔以大中祥符元年四月一日天書再降內中功德閣爲天禎節一如天貺節尋以仁宗嫌名改爲天祺節政和三年十一月五日以脩祀事天真示見詔爲天應節又以五月十二日祭方丘日爲寧貺節旣又以二月十五日太

上混元上德皇帝降聖日爲真元節八月九日青華帝君生辰爲元成節正月四日有太祖神御之州府官殿行香爲開基節十月二十五日爲天符節皆如天慶節著爲令高宗建炎元年十一月五日詔政和以來添置諸節除開基節外餘並依祖宗法

宋史卷一百一十二終

宋史卷一百一十三

禮志第六十六

開府儀同三司莊嚴軍國重事前書右丞相監修國史領經筵事都統殿院等

皇明朝列大夫國子監祭酒臣方從哲

承德郎右春坊右中允國子監司業事臣黃汝良等奉

勅重較刊

皇明朝列大夫國子監祭酒臣吳士元

承德郎司業仍加俸一級臣黃錦等奉

旨重修

禮十六 嘉禮四

宴饗 游觀 賜酺

宴饗之設所以訓恭儉示惠慈也宋制嘗以春秋之季仲及聖節郊祀籍田禮畢巡幸還京凡國有大慶皆大宴遇大災大札則罷天聖後大宴率於集英殿次宴紫

宸殿小宴垂拱殿若特旨則不拘常制凡大宴有司預於殿庭設山樓排場為羣仙隊仗六番進貢九龍五鳳之狀司天鷄唱樓於其側殿上陳錦繡帷帘垂香毬設銀香獸前檻內藉以文茵設御茶床酒器於殿東北楹間羣臣醜筆於殿下幕屋設宰相使相樞密使知樞密院參知政事樞密副使同知樞密院宣徽使三師三公僕射尚書丞郎學士直學士御史大夫中丞三司使給諫舍人節度使兩使留後觀察團練使待制宗室遙郡團練使刺史上將軍統軍軍廂指揮使坐於殿上文武四品以上知雜御史郎中郎將禁軍都虞候坐於朵殿自餘升朝官諸軍副都頭以上諸蕃進奉使諸道進奉將軍以上分於兩廡宰臣使相坐以繡墩曲宴行幸參用杌子知政事以下用二蒲墩加罽毯曲宴樞密使副並同軍都指揮使以上用一蒲墩自朵殿而下皆緋緣氈條席殿上器用金餘以銀其日樞密使以下先起居訖當時立者升殿宰相率百官入宣徽閣門通唱致辭謝宰相升殿進酒各就坐酒九行每上舉酒羣臣立侍次宰相次百官奉酒或傳旨命醕卽搯笏起飲再拜曲宴多命不拜或上壽朝會止令蒲酌不勸中飲更衣賜花有差宴訖舞蹈拜謝而退建隆元年大宴於廣德殿酒九行而罷乾德元年十

宋史卷一百三十三 禮志 二  
一月南郊禮成大宴廣德殿謂之飲福是後三年開寶三年五年六年七年八年並設秋宴于大明殿以長春節在二月故也太平興國之後止設春宴在大明者十一在舍光者六宴日親王樞密使副宣徽三司使駙馬都尉皆侍立軍校自龍武四廂都指揮使以上立於庭其宴契丹使亦於崇德殿但近臣及刺史郎中而上預焉淳化四年正月以南郊禮成大宴舍光殿直史館陳靖上言古之饗宴者所以省禍福而觀威儀也故宴以禮成賓以賢序風雅之作茲爲盛焉伏見近年內殿賜宴羣臣當坐於西殿兩廊者拜舞方畢趨馳就席品列

之序糾紛無別及至尊舉爵羣臣起立先後不整俯仰失節欲望自今令有司預依品位告諭其有踰越班次拜起失節喧譁過甚者並令糾舉又惟飲賜之典以寵武夫大烹之餘故爲盛饌計一飯所費可數人之屬厭而將校輩或至終宴之時尚有欲炙之色蓋執事者失於察視不及潔豐而使然也伏望並申嚴制至道元年三月御史中丞李昌齡亦言廣宴之設以均飲賜得齒高會宜乎盡禮而有位之士鮮克致恭當糾其不恪又供事禁庭當定員數籍姓名以謹其出入酒殽之司或虧精潔望分命中使巡察並從之咸平三年二月大宴

舍光殿自是始備設春秋大宴五年御史臺言大宴起居舍人司諫正言三院使御史並坐于殿廊望自今移升朵殿自餘依舊十二月詔凡內宴宗正卿令升殿坐班次依合班儀翰林學士梁顥請以春秋大宴小宴賞花行幸次爲四圖頒下閣門遵守從之景德二年九月詔曰朝會陳儀衣冠就列將以訓上下彰文物宜慎等威用符紀律况屢頒於條令宜自顧於典刑稍歷歲時漸成懈慢特申明制以儆其僚自今宴會宜令御史臺預定位次各令端肅不得誼譁違者殿上委大夫中丞及殿委知雜御史侍御史廊下委左右巡使察視彈奏內職殿直以上赴起居入殿庭行私禮者委閣門彈奏其軍員令殿前侍衛司各差都校一人提轄但虧失禮容卽送所司勘斷訖奏仍令閣門宣徽使互相察舉敢蔽匿者糾之大中祥符元年十二月詔宣徽院御史臺閣門殿前馬步軍司凡內宴臣僚軍員并祗候使臣等並以前後儀制曉諭務令遵稟違者密具名聞其軍員有因酒言詞失次及辭仆者卽先扶出或遣殿前司量添巡檢軍士護送歸營又詔臣僚有託故請假不赴宴者御史臺糾奏天禧四年直集賢院祖士衡言大宴將更衣羣臣下殿然後更衣更衣後再坐則羣臣班于殿

庭候上升坐起居謝賜花再拜升殿仁宗天聖三年監察御史朱諫言伏見大宴宗室先退允爲得禮尚有文武臣僚父子兄弟者皆預再坐欲望自今內宴百官有父子兄弟叔姪同赴再坐時卑者先退慶曆七年御史言凡預大宴并御筵其所賜花並須戴歸私第不得更令僕從持戴違者糾舉熙寧二年正月閣門言準詔裁定集英殿宴入殿人數中書二十二入樞密院三十人宣徽院八入親王八入昭德軍節度使兼侍中曹佺三人皇親使如三人皇親正刺史已上至節度使并駙馬都尉各一人翰林司一百七十八人御厨六百人儀鸞

司一百五十人祗候庫二十人內衣物庫七人新衣庫七人內弓箭庫三人鈐轄教坊所三人鐘鼓樓一十六人御藥院八人內物料庫九人法酒庫一十六人內酒坊八人入內內侍省前後行親事官共五人皇城司職員手分二人御史臺知班一十一人灑掃親從官人員已下一百人兩廊覲步親從官四十二人提舉司勾押官手分三人提舉火燭巡檢人員一十人快行親從官一十一人支散兩省花後苑造作所工匠等四人客省承授行首八人四方館職掌二人閣門承受行首已下一十八人是歲十一月以皇子生宴集英殿七年九月

詔自今大宴親王皇親使相樞密使副使宣徽使駙馬  
都尉並於殿門外幕次就賜酒食舊制會食集英西廊  
之廡下喧卑爲甚權發遣宣徽院吳充奏其事故有是  
命元豐七年三月大宴集英殿命皇子延安郡王侍立  
宰相王珪等率百官廷賀詔曰皇家慶事與卿等同之  
珪等再拜稱謝久之王乃退時王未出閣帝特令侍宴  
以見羣臣九年閣門言大宴不用兩軍妓女只用教坊  
小兒之舞王拱辰請以女童代之八年詔罷獨看故事  
大宴前一日御殿閱百戲謂之獨看脩國史范祖禹言  
是日進神宗紀草陛下覽先帝史冊甫畢卽觀百戲理  
似未安故請罷之元祐二年九月經筵講論語徹章賜  
宰臣執政經筵官宴于東宮帝親書唐人詩分賜之三  
年六月罷春宴八月罷秋宴以魏王出殯翰林學士蘇  
軾不進教坊致語故也是後以時雨未足集英殿試舉  
人尚書省火禁中祈禳邠國公主未敢皆罷宴凡大宴  
有故而罷則賜預宴官酒饌于閣門朝堂升殿官雖假  
故不從游宴亦遣中使就第賜焉親王中書樞密宣徽  
三司使副學士步軍都虞候以上三師三公東宮三師  
三公以下曾任中書門下致仕者亦同凡外國使預宴  
者祥符中宴崇德殿夏使於西廊南赴坐交使以次歇



空進奉押衙次交州契丹舍利從人則於東廊南赴坐  
四年又升甘州交州於朶殿夏州押衙於東廊南頭歇  
空坐七年龜茲進奉人使歇空坐於契丹舍利之下其  
後又令龜茲使副於西廊南赴坐進奏押衙重行於後  
瓜州沙州使副亦於西廊之南赴坐其餘大略以是爲  
準大觀三年議禮局上集英殿春秋大宴儀其日預宴  
文武百僚詣殿庭東西相向立皇帝出御需雲殿閣門  
內侍管軍等起居皇帝降坐御集英殿鳴鞭殿中監已  
下通班起居殿中監少監升殿通喚閣門官升殿攝左  
右軍巡使鞞笏起居訖繫鞵執杖侍立餘非應奉官分  
出次鐘鼓樓節級就位四拜起居次舍人通喚訖分引  
羣官橫行北向東上閣門官贊大起居班首出班俛伏  
跪致辭訖俛伏興復位羣官再拜舞蹈又再拜贊各就  
坐再拜舍人分引升殿席前相向立朶殿兩廡官立於  
席後有遼使則舍人引大遼舍利西入大起居贊各就  
坐贊再拜贊就坐引升西廊次舍人傳事引從人分入  
四拜起居謝坐並同舍利儀教坊使以下通班大起居  
看醖人謝升殿再拜內侍進御茶床殿侍酌酒訖次贊  
天武門外祗候東上閣門官詣御坐奏班首姓名以下  
進酒舍人分引殿上臣僚橫行北向贊再拜舍人引班

首稍前東上閣門官接引詣御坐東北向搢笏殿中監  
奉盤醴授班首少監啓醴以酒注之班首奉詣御前進  
訖少退虛跪興以槃授殿中監出笏東上閣門官引退  
舍人接引復位贊再拜舍人引班首稍前殿上臣僚席  
前相向立東上閣門官接引詣御坐東北向搢笏殿中  
監授槃奉詣御前西向立樂作皇帝飲訖舍人分引殿  
上臣僚橫行北向東上閣門引班首接醴退虛跪興授  
醴殿中監出笏引退舍人接引復位贊再拜贊各賜酒  
羣臣再拜贊各就坐羣官皆立席後復贊就坐酒初行  
羣官搢笏受酒先宰相次百官皆作樂皇帝再舉酒並

中監少

羣臣俱立席後樂作飲訖贊各就坐復行羣臣

酒飲訖皇帝三舉酒皆如第一之儀尚食與奉御進食

太官設羣臣食樂作賜祗應臣僚酒食贊謝拜訖復位

皇帝四舉酒

並典御進酒

樂工致語羣臣皆立席後致語訖

贊百官再拜就坐樂作皇帝五舉酒樂工奏樂庭下舞  
隊致詞樂作舞隊出東上閣門奏再坐時刻俟放隊訖  
內侍舉御茶床皇帝降坐鳴鞭羣臣退賜花再坐前二  
刻御史臺東上閣門催班羣臣戴花北向立內侍進班  
齊牌皇帝詣集英殿百官謝花再拜又再拜就坐內侍  
進御茶床皇帝舉酒殿上奏樂庭下作樂皇帝再舉酒

殿上奏樂庭下舞隊前致語樂作出皇帝三舉酒四舉酒皆如上儀若宣示醖卽隨所向閣門官以下揖稱宣示醖躬贊就坐若宣勸卽立席後躬飲訖贊再拜內侍舉御茶床舍人引班首以下降階再拜舞蹈又再拜訖分班出閣門官側奏無公事皇帝降坐鳴鞭集英殿飲福大宴儀初大禮畢皇帝逐頓飲福餘酒封進入內宴日降出酒旣三行泛賜預坐臣僚飲福酒各一醖羣臣飲訖宣勸各興立席後贊再拜謝訖復坐飲並如春秋大宴之儀紹興十三年三月三日詔宴殿陳設止用緋黃二色不用文繡令有司遵守更不制造五月閣門脩立集英殿大宴儀注乾道八年十二月詔今後前宰相到闕如遇赴宴賜茶其合坐墩杌非特旨並依官品又行門禁衛諸色祇應人依紹興例並賜絹花自是惟正旦生辰郊祀及金使見辭各有宴然大宴視東京時則亦簡矣曲宴凡幸苑園池籞觀稼畋獵所至設宴惟從官預謂之曲宴或宴大遼使副于紫宸殿則近臣及刺史正郎都虞候以上預暮春後苑賞花釣魚則三館秘閣皆預太祖建隆元年七月親征澤潞宴從臣于河陽行宮又宴韓令坤已下於禮賢講武殿賜襲衣器幣鞍馬以賞澤潞之功也四年四月宴從臣於玉津園乾德

三年七月六日詔皇弟開封尹宰相樞密使翰林學士中書舍人泛舟後苑新池張樂宴飲極歡而罷是歲重陽宴近臣於長春殿太宗太平興國九年三月十五日詔宰相近臣賞花於後苑帝曰春氣暄和萬物暢茂四方無事朕以天下之樂為樂宜令侍從司臣各賦詩帝習射于水心殿雍熙二年四月二日詔輔臣三司使翰林樞密直學士尚書省四品兩省五品以上三館學士宴于後苑賞花釣魚張樂賜飲命羣臣賦詩習射賞花曲宴自此始三年十二月一日大雨雪帝喜御玉華殿詔宰臣及近臣謂曰春夏以來未嘗飲酒今得此嘉稟思與卿等同醉又出御製雪詩令侍臣屬和後凡曲宴不盡載真宗咸平元年二月二十二日宴羣臣于崇德殿不作樂二年八月七日再宴用樂二月晦賞花宴于後苑帝作中春賞花釣魚詩儒臣皆賦遂射于水殿盡歡而罷自是遂為定制四年十一月二十日御龍圖閣曲宴詔近臣觀太宗草行飛白篆籀八分書及畫景德二年十二月五日宴尚書省五品諸軍都指揮使以上契丹使于崇德殿不舉樂以明德太后喪制故也時契丹初來賀承天節擇膳夫五人齎本國異味就尚食局造食詔賜膳夫衣服銀帶器帛六年七月二十九日詔

輔臣觀粟于後苑御山子觀御製文閣御書及嘉禾圖  
賜飲是日皇子從游四年七月十一日詔近臣及寇準  
馮拯觀內苑穀遂宴于玉宸殿十月二十九日詔皇太  
子宗室近臣諸帥赴玉宸殿翠芳亭觀稻賜宴仍以稻  
分賜之仁宗天聖二年既禫除百官五表請聽樂而秋  
燕用樂之半詔輔臣曰昨日宴宮中朕數四上勉皇太  
后聽樂王欽若以聞太后太后曰自先帝棄天下吾終  
身不欲聽樂皇帝再三爲請其可重違乎明年上元節  
乃朝謁景靈上清宮啓聖院相國寺還御正陽門宴從  
官觀燈次日太后詔命婦臨觀及春秋大宴歲爲常夏

觀南御莊刈麥秋瑞聖園刈穀並宴從官或射不爲常  
皇祐五年後苑寶政殿刈麥謂輔臣曰朕新作此殿不  
欲植花歲以種麥庶知穡事不易也自是幸觀穀麥惟  
就後苑春夏賞花釣魚則歲爲之嘉祐七年十二月特  
召兩府近臣三司副使臺諫官皇子宗室駙馬都尉管  
軍臣僚至龍圖天章閣觀三聖御書及寶文閣爲飛白  
分賜下逮館閣官製觀書詩賜韓琦以下和進遂宴羣  
玉殿傳詔學士王珪撰詩序刊石于閣數日再會天章  
閣觀三朝瑞物復宴羣玉殿酒行上曰天下久無事今  
日之樂與卿等共之宜盡醉勿復辭因召韓琦至御榻

前別賜一大卮出禁中名花金盤貯香藥令各侍歸莫  
不霑醉至暮而罷熙寧元年四月御史中丞滕甫言臣  
聞君命召不俟駕此臣子所以恭其上也今賜宴而有  
託詞不至者甚非恭上之節也請自今宴設羣臣非大  
故與實有疾病無得託詞仍令御史臺察舉二年八月  
實錄書成皆宴垂拱殿十月脩定閣門儀制所言垂拱  
殿曲宴當直翰林學士與觀文資政龍圖寶文樞密直  
龍圖天章寶文閣直學士並赴坐而翰林學士兼他職  
者不預考之官制似未齊一請自今曲宴翰林學士與  
雜學士並赴從之元豐五年七月以兩朝國史書成其

于垂拱殿十一月宴景靈宮祠官于紫宸殿元祐二年  
九月經筵講論語徹章賜宰臣執政經筵官宴于東宮  
帝親書唐人詩賜之紹聖三年十一月以進神宗皇帝  
實錄畢曲宴宰臣執政文臣試侍郎武臣觀察使以上  
并脩國史官赴坐元符元年五月詔受寶畢宴于紫宸  
殿宰臣以下文臣職事官六曹員外郎監察御史以上  
武臣郎將諸軍副指揮使以上預坐政和二年三月上  
巳御筵詔令移用他日以國有故宰臣請罷宴故也大  
觀三年議禮局上垂拱殿曲宴儀皇帝視事畢東上閣  
門進呈坐圖舍人奏閣門無公事皇帝降坐鳴鞭入殿

後閣諸司排設備東上閣門附內侍奏班齊皇帝出閣  
升坐鳴鞭三公直學士以上親王使相至觀察使以上  
分東西入詣殿庭橫行北向立定班首奏聖躬萬福舍  
人贊各就坐再拜訖分引詣東西階升殿席前相向立  
次教坊使以下常起居次看戲人謝升殿次內侍進御  
茶床殿侍酌酒訖閣門詣御坐躬奏班首姓名以下進  
酒舍人分引殿上臣僚橫行北向贊再拜班首奉酒躬  
進樂作皇帝飲訖舍人贊各賜酒羣官俱再拜贊各就  
坐羣官皆立席後復贊就坐酒初行先宰相次百官皆  
作樂後準此尚食與奉御進食太官令設羣官食酒五行

若宣示醖卽隨所向閣門揖稱宣示醖躬贊就坐若宣  
勸卽立席後躬飲贊再拜內侍舉御茶床舍人引班首  
以下降階橫行北向再拜分班出皇帝降坐上巳重陽  
賜宴儀其日預宴官以下並赴宴所就次諸司排設備  
預宴官以下詣庭中望闕位立次中使詣班首之左稍  
前立中使宣曰有敕在位官皆再拜訖中使宣曰賜卿  
等御筵在位官皆再拜搢笏舞蹈又再拜中使退預宴  
官分東西升階就坐酒行樂作飲訖食畢樂止酒五行  
預宴官並興就次賜花有差少頃戴花畢與宴官詣望  
闕位立謝花再拜訖復升就坐酒行樂作飲訖食畢樂

止酒四行而退

游觀天子歲時游豫則上元幸集禧觀相國寺御宣德門觀燈首夏幸金明池觀水嬉瓊林苑宴射大祀禮成則幸太一宮集禧觀相國寺恭謝或詣諸寺觀焚香或至近郊閱武觀稼其事蓋不一焉太祖建隆元年四月幸玉津園是後凡十三臨幸九月幸宜春苑是後觀習水戰者二十有八幸大相國寺封禪寺者各五龍興寺及皇弟開封尹園各三幸太清觀建隆觀者再崇夏寺廣化寺等覺寺者各一觀水磴者八閱砲車觀水櫃觀稼幸飛龍院幸開封尹幸都亭驛幸禮賢院幸茶庫染

院幸河倉幸金鳳園皆一再至焉太宗太平興國二年二月幸新鑿池賜役卒錢布有差六月幸飛龍院是後凡四幸三年四月觀刈麥九年正月六日幸景龍門外水磴帝臨水而坐召從臣觀之因謂曰此水出於山源清澄甘潔近河之地水味皆甘豈河潤所及乎宋琪等曰亦猶人性善惡染習致然帝曰卿言是也四月幸金明池習水戰帝御水殿召近臣觀之謂宰相曰水戰南方之事也今其地已定不復施用時習之示不忘戰耳因幸講武臺閱諸軍都試軍中之絕技者遽加賜賚遂登瓊林苑樓陳百戲擲金錢令樂人等之極歡而罷五



月二日出南薰門觀稼召從臣列坐田中令民刈麥咸  
賜以錢帛回幸玉津園觀漁張樂習射既宴而歸明年  
五月幸城南觀麥賜田夫布帛有差雍熙四年四月幸  
金明池觀水嬉賜從臣飲帝曰南齊天涼中外無事宜  
勿惜醉因登苑中樓盡歡而罷淳化三年三月幸金明  
池命爲競渡之戲擲銀甌於波間令人泗波取之因御  
船奏教坊樂岸上都人縱觀者萬計帝顧視高年皓首  
者就賜白金器皿九月幸潛龍園駐輦池東岸臨水謂  
近臣曰朕不至此已十年昔尹京日無事嘗痛飲池上  
今池邊之木已成林矣因顧教坊使郭守忠等數人曰  
汝等前日以樂童從我今亦皓首光陰迅速如此嗟嘆  
久之帝親引滿舉白羣臣盡醉真宗咸平元年八月幸  
諸王宮二年九月幸開寶寺福聖院是後二寺臨幸者  
凡十有四三年五月幸金明池觀水戲揚旗鳴鼓分左  
右翼植木繫綵以爲標識方舟疾進先至者賜之移幸  
瓊林苑登露臺鈞容直奏樂臺下百戲競集從臣皆醉  
自是凡四臨幸九月幸大相國寺是後再幸者九幸上  
清宮者十有二幸玉津園者十幸太一宮玉清昭應宮  
各六餘不盡載大中祥符八年正月十九日中書門下  
上言伏觀今月十四見皇帝詣諸宮寺焚香總三十餘

處過百拜以上臣等待從倍增憂灼昨崇政殿已面奏  
陳臣聞尊事萬靈固先精意登用百禮乃貴時中在經  
久之從宜必裁正而惟允伏望特命攸司載詳定式自  
今車駕幸諸宮觀寺院正殿再拜及諸殿令羣臣以下  
分拜庶垂億載允叶通規乃詔禮儀院詳定差減焉仁  
宗景祐三年詔閣門詳定車駕幸宮觀寺院支賜茶絹  
等第哲宗紹聖四年三月八日詔自今遇車駕出新城  
令殿前馬步軍司取旨權差馬步軍赴新城外四面巡  
檢下祇應每壁馬軍二百人步軍三百人並於城外巡

警

三元觀燈本起於方外之說自唐以後常於正月望夜  
開坊市門然燈宋因之上元前後各一日城中張燈大  
內正門結綵爲山樓影燈起露臺教坊陳百戲天子先  
幸寺觀行香遂御樓或御東華門及東西角樓飲從臣  
四夷蕃客各依本國歌舞列於樓下東華左右掖門東  
西角樓城門大道大宮觀寺院悉起山棚張樂陳燈皇  
城雉堞亦徧設之其夕開舊城門達旦縱士民觀後增  
至十七十八夜太祖建隆二年上元節御明德門樓觀  
燈召宰相樞密宣徽三司使端明翰林樞密直學士兩  
省五品以上官見任前任節度觀察使飲宴江南吳越

朝貢使預焉四夷蕃客列坐樓下賜酒食勞之夜分而  
罷三年正月十三夜然燈罷內前排場戲樂以昭憲皇  
太后喪制故也太平興國二年七月中元節御東角樓  
觀燈賜從官宴飲五年十月下元節依中元例張燈三  
夜雍熙五年上元節不觀燈躬耕籍田故也後凡遇用  
兵及災變諸臣之喪皆罷真宗景德元年正月十四日  
賜大食三佛齊蒲端諸國進奉使緡錢令觀燈宴飲大  
中祥符元年十一月二十五日詔天慶節聽京城然燈  
一晝夜六年四月十六日先天降聖節亦如之天聖二  
年六月罷降聖節然燈政和三年正月詔放燈五日五  
年十二月二十九日詔景龍門預爲元夕之具實欲觀  
民風察時態黼飾太平增光樂國非徒以遊豫爲事特  
賜公師宰執以下宴及御製詩四韻賜太師蔡京六年  
正月七日御筆今歲閏餘候晚猶未春和晷短氣寒於  
宴集無舒緩之樂景靈宮朝獻移十四日東宮十五日  
西宮畢詣上清儲祥宮燒香十六日詣醴泉觀等處燒  
香上元節移於閏正月十四日爲始宣和六年十二月  
二十四日賜太師蔡京以下應兩府赴睿謨殿宴景龍  
門觀燈續有旨宣太傅王黼赴宴七年正月十八日宴  
輔臣觀燈

賜酺自秦始皇法三人以上會飲則罰金故因事賜酺  
吏民會飲過則禁之唐嘗一再舉行太宗雍熙元年十  
二月詔曰王者賜酺推恩與衆共樂所以表升平之盛  
事契億兆之歡心累朝以來此事久廢蓋逢多故莫舉  
舊章今四海混同萬民康泰嚴禋始畢慶澤均行宜令  
士庶之情共慶休明之運可賜酺三日二十一日御丹  
鳳樓觀酺召待臣賜飲自樓前至朱雀門張樂作山車  
旱船往來御道又集開封府諸縣及諸軍樂人列於御  
街音樂雜發觀者溢道縱士庶遊觀遷市肆百貨於道  
之左右召畿甸耆老列坐樓下賜之酒食明日賜羣臣  
宴於尚書省仍作詩以賜明日又宴羣臣獻歌詩賦頌  
者數十人真宗景德三年九月詔許羣臣士庶選勝宴  
樂御史臺皇城司毋得糾察四年二月甲申上御五鳳  
樓觀酺宗室近臣侍坐樓前露臺奏教坊樂召父老五  
百人列坐賜飲於樓下後二日上復御樓賜宗室文武  
百官宴於都亭驛賜諸班諸軍將校羊酒大中祥符元  
年正月詔應致仕官並令赴都亭驛酺宴御樓日合預  
坐者亦聽又詔朝臣已辭未見並聽赴會凡賜酺命內  
諸司使三人主其事於乾元樓前露臺上設教坊樂又  
駢繫方車四十乘上起綵樓者二分載鈞容直開封復

爲棚車二十四每十二乘爲之皆駕以牛被之錦繡紫以綵紉分載諸軍京畿伎樂又於中衢編木爲欄處之徙坊市邸肆對列御道百貨駢布競以綵幄鏤版爲飾上御乾元門召京邑父老分番列坐樓下傳旨問安否賜以衣服茶帛若五日則第一日近臣侍坐特召丞郎給諫上舉觴教坊樂作二大車自昇平橋而北又有旱船四挾之以進輶車由東西街交鶩並往復日再焉東距望春門西連閶闔門百戲競作歌吹騰沸宗室親王近列牧伯泊舊臣宗室官爲設綵棚於左右廊廡士庶縱觀車騎填溢歡呼震動第二日宴羣臣百官於都亭驛宗室於親王宮第三日宴宗室內職於都亭驛近臣於宰相第第四日宴百官於都亭驛宗室於外苑第五日復宴宗室內職於都亭驛近臣於外苑上多作詩賜令屬和及別爲勸酒詩禁軍將校日會於殿前馬步軍之解是歲東封泰山所過州府上御子城門樓設山車綵船載樂從臣侍坐本州父老進奉使蕃客悉預兗州駐蹕仍賜羣臣會於延壽寺所在改賜門名兗州曰回鑾置慶鄆州曰升中延福濮州曰告成延慶澶州以行宮迫隘當衢結綵爲殿名曰延禧幸汾陰亳州皆如東封路河中府門名曰詔畢宣恩陝州曰霈澤惠民鄭州

曰回鑾慶賜西京將議改五鳳樓名上曰此太祖所建因瑞應不可更也華陰就行宮宴父老賜驛亭名曰宣澤至鄭州以太宗忌日南過罷會賜與如例亳州曰奉元均慶南京曰重熙頌慶天禧五年以畿縣追集老人疲勞之故止召兩赤縣坊縣父老預會其不預名亦聽給以賜物天下賜酺各令州府會官屬父老邊州或遣中使就賜又詔開封府賜酺日罪人酺酒而不傷人者咸釋之再犯論如法後賜酺皆準此宋之繁庶於斯為盛後遂為定制云

宋史卷一百一十三終

宋史卷一百一十四

禮志第六十七

開府儀同三司在國錄軍國重事前中書丞相監脩國史領總筵事都總裁脫脫等脩

皇明朝列大夫國子監祭酒臣方從哲  
承德郎右春坊右中允管國子監司業事臣黃汝良等奉

勅重較刊  
皇明朝列大夫國子監祭酒臣吳士元  
承德郎司業仍加俸一級臣黃 錦等奉  
旨重修

禮十七 嘉禮五

巡幸 養老 視學 賜進士宴  
幸祕書 進書儀 夫射儀 鄉飲酒儀

巡幸之制唐開元禮有告至肆觀考制度之儀開寶通禮因之太祖幸西京所過賜夏秋田租之半真宗朝諸陵及舉大禮塗中皆服折上巾窄袍出京過京城服

萬曆二十七年刊

袍具鸞駕羣臣公服繫鞵供奉班及內朝官前導凡從官並日赴行宮合班起居晚朝視事羣臣不赴中頓待食百官就宿頓迎駕訖先發或道塗隘遠則免迎駕將進發近臣諸軍賜裝錢出京留司馬步諸軍夾道左至新城門外奉辭留守辭於門內百官父老辭於苑前召留守等賜飲苑中州縣長吏留司官待于境所過賜巡警兵守津梁行郵治道卒時服錢履父老綾袍茶帛塗中賜衛士緡錢所幸寺觀賜道釋茶帛或加紫衣師號吏民有以饗餼酒果方物獻者計值答之命官籍所過繫囚逋負者日引對多原釋仍採訪民間疾苦振恤鰥寡孤獨車服度量權衡有不如法則舉儀制禁之有奇材異德及政事尤異者孝子順孫義夫節婦爲鄉里所稱者其不守廉隅昧於正理者並條析以聞官吏知民間疾苦者亦許錄奏所過州府結綵爲樓陳音樂百戲道釋以威儀奉迎者悉有賜東京留守遣官表請還京優詔答之駕還京大陳兵衛以入凡行幸太祖太宗不常其數自咸平中車駕每出金吾將軍帥士二百人執槌周遶謂之禁圍春夏緋衣秋冬紫衣郊祀省方並增二百服錦襖出京師則加執劔親王中書樞密宣徽行圍內餘官圍外大禮備儀衛則有司先布土爲黃道自

宮至祀所左右設香臺畫瓮青繩闌于

巡省在塗則不設

凡巡

省翰林進號傳詩付樞密院每夕摘字令衛士相應爲  
識東京舊城城門西京皇城司並契勘內外城宮廟門  
並勘箭出入皆然入藩鎮外城子城門亦勘箭朝陵定  
扈從官人數入栢城者僕射以上三人丞郎以上二人  
餘各一人東封定仗內導駕官從人數親王中書樞密  
宣徽三司使四人學士尚書丞郎節度使三人大兩省  
大卿監三司副使樞密承旨客省閤門使副金吾大將  
軍押仗鳴珂內殿崇班以上二人餘各一人命諸司巡  
察之自後舉大禮皆循此制建炎元年七月詔曰祖宗

都汴垂二百年比年以來圖慮弗臧禍生所忽肆朕纂  
承顧瞻宮室何以爲懷是用權時之宜法古巡狩駐蹕  
近甸號召軍馬朕將親督六師以援京城及河北河東  
諸路與之決戰歸宅故都迎還二聖以稱朕夙夜憂勤  
之意十月一日車駕登舟巡幸淮甸宰執侍從百司三  
衙禁旅五軍將佐扈衛以行駐蹕揚州三年幸杭州自  
杭州幸江寧府尋幸浙西自浙西幸浙東乃下詔曰國  
家遭金人侵逼無歲無兵朕纂承以來深軫念慮謂父  
兄在難而吾未撫不欲使之陷於鋒鏑故包羞忍恥  
爲退避之謀冀其逞志而歸稍得休息自南京移淮甸



自淮甸移建康而會稽播遷之遠極于海隅卑詞厚禮使介相望以至願去尊稱甘心貶屈請用正朔比於藩臣遣使哀祈無不曲盡假使金石無情亦當少動累年卑屈卒未見從生民嗷嗷何時寧息今諸路之兵聚於江浙之間朕不憚親行據其要害如金人尚容朕爲汝兵民之主則朕於事大之禮敢有不恭或必用兵窺我行在傾我宗社塗炭生靈竭取東西金帛子女則朕亦何愛一身不臨行陣以踐前言以保羣生朕已取十一月二十五日移蹕前去浙西爲迎敵計惟我將士人民念國家涵養之恩二聖拘縻之辱悼殺戮焚殘之禍與

其束手待斃曷若并計合謀一心戮力奮勵而前以存家國乃詔御前應奉官司自合扈從外內太常寺據實用人數扈從餘接續起發四年正月次台州二月次溫州三月幸浙西紹興元年詔移蹕臨安府六年詔周親軍師車駕進發遣官奏告天地社稷宗廟自臨安幸平江尋幸建康八年二月還臨安三十一年九月詔金人背盟失信今率精兵百萬躬行天討用十二月十日車駕進發應行宮臨安府文武百僚城北奉辭其曰應文武百僚先詣城北幕次俟車駕御舟將至御史臺閣門太常寺分引文武百僚立班定兩拜訖俟御舟過班退

三十二年正月詔視師江上北騎遁去兩淮無警已委重臣統護諸將經畫進討今暫還臨安畢恭文禱廟之禮宜令有司增脩建康百官吏舍諸營砦以備往來巡幸可擇日進發車駕還宮

養老於太學皇帝服通天冠絳紗袍乘金輅至太學酌獻文宣王三祭酒再拜歸御幄北車駕初出量時刻遣使迎三老五更於其第三老五更俱服朝服乘安車導從至太學就次國老庶老有司預戒之各服朝服集於其次大樂正帥工人二舞入立於庭東上閣門御史臺太常寺客省四方館自下分引百官宗室客使學生等

以次入就位如視學班太常博士贊三老五更俱出次引國老庶老立於後重行異位禮直官通事舍人引左輔奏請中嚴少頃又奏外辦皇帝出大次侍衛如常儀大樂正令撞黃鐘之鐘右五鐘皆應協律郎跪俛伏舉麾興宮架乾安之樂作皇帝卽御坐樂止典儀曰再拜在位官皆再拜三老五更杖而入各左右二人夾扶太常博士前引史臣執筆以從三老五更入門宮架和安之樂作至宮架北北向立以東爲上奉禮郎引羣老隨入位於其後樂止博士揖進三老在前五更在後仍杖夾扶宮架和安之樂作至西階下樂止博士揖三老五

更自西階升堂國老庶老立堂下三老五更當御坐揖  
羣老亦揖皇帝爲興次奉禮郎揖國老升堂博士引三  
老五更奉禮郎引國老以下各於席後立典儀贊各就  
坐贊者承傳宮架尊安之樂作三老五更就坐三公授  
几九卿正履訖殿中監尚食奉御進珍羞及黍稷等先  
詣御坐前進呈遂設於三老前樂止尚食奉御詣三老  
坐前執醬而饋訖尚醞奉御詣酒尊所取爵酌酒奉御  
執爵奉於三老次太官良醞令以次進珍羞酒食於五  
更羣老之前皆食大樂正引工人升登歌奏惠安之樂  
三終史臣既錄三老所論善言善行宮架作申安之樂  
憲言成福之舞畢又舞退作受成告功之舞畢三老以  
下降筵博士引三老五更於堂下當御坐前奉禮郎引  
羣老復位俱揖皇帝爲興三老五更降階至堂下宮架  
和安之樂作出門樂止禮直官通事舍人引左輔前奏  
禮畢退復位典儀贊拜訖皇帝降坐太常卿導還大次  
百僚以次退車駕還宮三老五更升安車導從還翼日  
詣闕表謝

視學哲宗始視學遂幸國子監詣至聖文宣王殿行釋  
奠禮一獻再拜御敦化堂召從官賜坐禮部太常寺本  
監官承事郎以上侍立承務郎以下三學生坐于東西

廡侍講吳安詩執經祭酒豐稷講尚書無逸終篇復命  
宰臣以下至三學生坐賜茶豐稷賜三品服本監官學  
官等賜帛有差遂幸昭烈武成王廟酌獻肅揖徽宗幸  
太學遂幸辟雍奠獻如上儀詔司業吳綱等轉官改秩  
循資賜章服文武學生授官免省試文解賜帛有差所  
司預設次於敦化堂後又於堂上稍北當中兩間設次  
南向設御坐又設從官及講筵講書執經官并太學官  
坐御坐之南東西重行異位太學生坐於兩廡相向並  
北上宰臣以下從官之次設於中門外皇帝酌獻文宣  
王畢幸太學降輦入次簾垂更衣禮直官通事舍人引  
講官與侍立官入就堂下皆繫鞵講書執經官學生各  
立堂下東西相向俟報班齊皇帝升坐班首奏萬福在  
位者皆應喏訖閣門使承旨臨階宣升堂通事舍人喝  
拜應在位者再拜訖分左右升堂各就位少立起居郎  
舍人分左右侍立禮百官通事舍人引講書及執經官  
就北向位班首奏萬福閣門使宣升堂舍人喝再拜訖  
分左右升堂立於御坐左右講書官在西東向執經官  
在東西向學生就北向位舍人喝拜在位者皆再拜立  
於東西兩廡內侍進書案以經授執經官稍前進於案  
上舍人喝拜就坐宰臣以下並堂上坐如閣門所進坐

位圖講書畢通事舍人曰可起羣臣皆起降階立執經  
官降講書官於御坐前致辭訖亦降舍人喝拜如有宣  
答卽再喝拜閣門宣坐賜茶舍人喝拜訖宰臣以下升  
堂各立於位後學生各就北向位舍人喝拜在位者俱  
拜訖各分東西廡以北爲上下舍人喝就坐上下皆就  
坐賜茶畢禮直官通事舍人引堂上官降階就位舍人  
喝拜在位者俱拜訖禮直官引之以次出學生就位舍  
人喝拜學生俱再拜退紹興十三年七月國學大成殿  
告成奉安廟像明年二月國子司業高闕請幸學上從  
之詔略曰偃革息民恢儒建學聲明丕闡輪奐一新請  
旣方堅理宜從欲將款謁於先聖仍備舉於舊章三月  
上服鞞袍乘輦入監止輦于大成殿門外入幄羣臣列  
班於庭帝出幄升東階跪上香執爵三祭酒再拜羣臣  
皆再拜上降入幄分奠從祀如常儀尚舍先設次於崇  
化堂之後及堂上之中南向設御坐閣門設羣臣班於  
堂下如月朔視朝之儀宰輔從臣次於中門之外上乘  
輦幸太學降輦於堂入次更衣講官入就堂下講位北  
向執經官學生皆立於堂下東西相向帝出次升御坐  
羣臣起居如儀乃命三公宰輔以下升堂皆就位左右  
史侍立講書及執經官北面起居再拜皆命之升立於

御坐左右學生北面再拜分立兩廡北上內侍進書案  
牙籤以經授執經官賜三公宰輔以下坐講畢羣臣皆  
起降階東西相向立執經官降講官進前致詞乃降北  
面再拜左右史降乃賜茶三公以下北面再拜升各立  
於位後學生北面再拜分兩廡立上下就坐賜茶畢三  
公以下降階學生自兩廡降階北面再拜羣臣以次出  
上降坐還次乘輦還宮特命禮部侍郎秦熈執經司業  
高閔講易之泰遂幸養正持志二齋賜閔三品服學官  
遷秩諸生授官免舉賜帛有差上旣奠拜注視貌象翼  
翼欽慕覽唐明皇及太祖真宗徽宗所製贊文命有司  
悉取從祀諸贊皆錄以進帝遂作先聖及七十二子贊  
冠以序文親灑翰墨以方載之五月丙辰登之綵殿備  
儀衛作樂命監學之臣自行宮北門迎置學宮揭之大  
成殿上及二廡序曰朕自睦鄰息兵首開學校教養多  
士以遂忠良繼幸太學延見諸生濟濟在庭意甚嘉之  
因作文宣王贊機政餘閒歷取顏回而下七十二人亦  
爲製贊用廣列聖崇儒右文之聲復知師弟子間纓弁  
森森覃精繹思之訓其於世道心庶幾焉二十六年十  
二月言者謂陛下崇儒重道製爲贊辭刻宸翰于琬琰  
光昭往古寰宇儒紳孰不顧瞻雲漢之章請奉石刻于

國子監以碑本徧賜郡學從之淳熙四年孝宗幸太學如紹興之儀命禮部侍郎李燾執經祭酒林光朝講大學尋幸武學如太學之儀帝肅揖武成王不拜嘉泰三年正月寧宗幸太學如淳熙之儀淳祐元年正月理宗幸太學宗武兩學官屬生員並赴太學陪位候車駕至學詣先聖文宣王位三上香執爵三祭酒俛伏興再拜在位官皆再拜皇帝至崇化堂宰臣使相執政並起居執經官由東階講官由西階並升堂於御前分東西相向立次引國子監三學學官學生一班北面再拜贊各就坐賜茶俟講書畢起立班再拜禮成執經官講書官國子監三學官生員各推恩轉官有差咸淳三年正月戊辰度宗幸太學祇謁禮部尚書陳宗禮執經國子祭酒雷宜中講中庸餘並如儀

賜貢士宴名曰聞喜宴政和新儀押宴官以下及釋褐貢士班首初入門正安之樂作至庭中望闕位立樂止預宴官就位再拜訖押宴官西向立中使宣曰有敕在位者皆再拜訖中使宣曰賜卿等聞喜宴在位者皆再拜搢笏舞蹈又再拜次引押宴官稍前謝坐再拜在位者皆再拜若賜敕書卽引貢士班首稍前中使宣曰有敕貢士再拜中使宣曰賜卿等敕書班首稍前搢笏跪

中使授敕書訖少退班首以敕書加笏上俛伏興歸位  
再拜在位者皆再拜凡預宴官分東西升階就坐貢士  
以齒酒初行賓與賢能之樂作飲訖食畢樂止酒再行  
於樂辟雍之樂作酒三行樂育人材之樂作酒四行樂  
且有儀之樂作酒五行正安之樂作再坐酒行樂作節  
次如上儀皆飲訖食畢樂止押宴官以下俱興就次賜  
花有差少頃戴花畢次引押宴官以下并釋褐貢士詣  
庭中望闕位立謝花再拜復升就坐酒行樂作飲訖食  
畢樂止酒四行訖退次日預宴官及釋褐貢士入謝如  
常儀寧宗慶元五年五月賜新及第進士曾從龍以下  
聞喜宴于禮部貢院上賜七言四韻詩祕書監楊王休  
以下繼和以進自後每舉並如之

幸祕書省紹興十四年七月新建祕書省成祕書少監  
游操等援宣和故事請車駕臨幸詔從之二十七年幸  
祕書省至右文殿降輦放手詔曰蓋聞周建外史掌三  
皇五帝之書漢選諸儒定九流七略之奏文德之盛後  
世推焉仰惟祖宗建開冊府凡累朝名世之士由是以  
興而一代致治之原蓋出於此朕嘉與學士大夫共宏  
斯道迺一新史觀新御榜題肆從望幸之忱以示右文  
之意嗚呼士習爲空言而不爲有用之學久矣爾其勉



脩術業益勵猷爲一德一心以共赴亨嘉之會用丕承我祖宗之大訓顧不善歟遂陳累朝御書御製晉唐書畫三代古器次宣皇太子宰臣以下觀訖遺遂賜宴于右文殿酒五行羣臣再拜退車駕還內賜少監游操三品服御書扇餘官筆墨館閣官各轉一官淳熙五年九月十三日孝宗幸祕書省如紹興十四年之儀帝賦詩羣臣皆屬和

進書儀紹興二十年五月八日進呈中興聖統太常博士丁屢明言乞比附進呈玉牒行禮二十四年進呈徽宗御集禮部言昨紹興十年徽宗御製擬以敷文名閣今乞權安奉於天章閣續俟崇建二十六年十月進呈太后回鑿事實二十七年三月宰臣沈該言玉牒所官陳康伯等先次編脩太祖皇帝玉牒自誕聖至卽位自建隆元年至開寶九年通脩一十七年開基玉牒舊制以梅紅羅面簽金字今欲題曰皇宋太祖皇帝玉牒又編脩今上皇帝玉牒自誕聖之後聖德祥瑞建大元帥府事蹟至卽帝位二十餘年又自卽位後編脩至紹興二年通脩二十六年中興玉牒今欲題曰皇宋今上皇帝玉牒宣祖太祖太宗魏王下各宗仙源類譜五世昭穆今已脩寫進本乞擇日進呈詔從其請前期儀鸞司

臨安府於玉牒殿上南向設權安奉玉牒類譜并中興  
聖統幄次又於玉牒所向外設騎從官及文武百官等  
待班幕次又於景靈宮內外設騎從官幕次進呈前一  
日俟朝退玉牒所提領官都大提舉諸司官承受官玉  
牒所官等赴本所幕次宿衛俟儀仗樂人等排立御史  
臺閣門太常寺分引玉牒所官詣玉牒殿下北向立禮  
直官揖躬拜提  
領官拜在位官皆再拜訖次引提領官詣香案前拈笏  
三上香執笏退復位皆再拜訖班退歸幕次宿衛儀仗  
樂人作樂晝夜更互排立其日五更御史臺閣門太常  
寺分引提領官宰執使相侍從臺諫兩省官知閣禮官  
南班宗室詣玉牒殿北向立禮直官揖躬拜提領官拜  
在位官皆再拜訖次引提領官詣玉牒類譜香案前拈  
笏三上香執笏退復位禮直官引提領官詣幄前西向  
立次騎從官分左右乘馬俟玉牒所率輦官奉擎玉牒  
類譜輿輿進行樂人作樂儀衛儀仗迎引次引提領官  
宰執使相侍從臺諫兩省官知閣禮官南班宗室騎從  
至和寧門下馬執笏步從玉牒類譜至垂拱殿門外幄  
次步從官權歸幕次樂止儀衛樂人等並於幄次前排  
立俟進呈玉牒類譜並如閣門儀訖俟玉牒類譜出殿

門御史臺閣門太常寺分引提領官宰執使相待從臺  
諫兩省官知閣禮官南班宗室分左右執笏步從儀衛  
樂人前引迎奉出皇城北宮門步從等官上馬騎從至  
和寧門外前引將至玉牒所御文臺閣門太常寺分引  
文武百官於玉牒所門內殿門外立班內文臣釐務通  
直郎以上及承務郎見任寺監主簿執事官以上武臣  
脩武郎以上迎拜訖如值雨地下沾濕迎拜官吏不迎  
拜騎從官至玉牒所並下馬執笏步從詣玉牒殿下分  
東西相向立禮直官引提領官詣玉牒類譜櫺前西向  
立定俟玉牒所率輦官奉擎玉牒類譜入幄儀仗儀衛  
輦官樂人更互排立提領官宰執使相待從臺諫兩省  
官知閣禮官南班宗室及玉牒所官分官赴景靈宮迎  
奉皇帝中興聖統赴玉牒殿同時安奉俟安奉時將至  
設香案畢次御史臺閣門太常寺分引文武百官詣玉  
牒殿下並北向立班定禮直官引提領官詣幄前西立  
俟日官報時及次玉牒所安奉玉牒類譜訖次引提領  
官復位北向立定禮直官揖躬拜提領官拜在位官皆  
再拜訖禮直官引提領官詣香案前稽笏三上香執笏  
退復位立定在位皆再拜訖退儀衛樂人等以次退自  
是凡進書並倣此惟進太上皇聖政則有詣德壽宮之

儀淳祐五年二月十二日進孝宗光宗兩朝御集寧宗  
實錄及理宗玉牒日曆其日皇帝御垂拱殿提舉官禮  
儀使宗室使相宰執以下赴實錄院右文殿玉牒所經  
武閣並行燒香禮畢奉迎諸書至和寧門步導至垂拱  
殿以俟班齊各隨腰輿入殿下東西向立皇帝服鞞袍  
出宮殿下鳴鞭禁衛諸班直親從等并入內省執骨朶  
使臣國史實錄院日曆所編脩經武要略所玉牒所點  
檢文字以下并腰輿下人並迎駕自贊常起居內擎腰  
輿人不拜止應喏皇帝卽御坐先知閣門官以下各班  
起居如常儀次日內官下殿各取合進呈書匣升殿於  
殿上東壁各置案上以南爲上知閣門官二員自御坐  
前導皇帝起詣三朝諸書香案前褥位東向立閣門提  
點奏請上香三上香訖又奏請皇帝再拜訖知閣門官  
前導皇帝復歸御坐知閣門官歸東朶殿上侍立儀鑾  
司徹香案拜褥降東朶殿次舍人請國史實錄院以下  
提舉官禮儀使宰執并進讀官升殿於御坐東面西立  
國史實錄院國史日曆所編脩經武要略所玉牒所官  
殿下依舊立俟入內官進御案孝宗御集提舉官并進  
讀御集官稍前立分進讀御集官於御前過西壁面東  
立御集提舉諸司官於孝宗御集匣前摺笏啓封開鑰

訖出笏歸侍立位御集承受官搢笏於御集匣內取冊  
轉授提舉官搢笏接訖承受出笏提舉官奉冊置御案  
上出笏皇帝起前立提舉諸司官承受官分東西相向  
立並搢笏揭冊訖各出笏進讀御集官搢笏稍前取篋  
子指讀逐版揭冊指讀並如上儀俟進讀畢皇帝復坐  
進讀御集官置篋子於御案上出笏却於御前東壁面  
西立以俟提舉官搢笏收冊復授承受官搢笏接訖提  
舉官出笏稍後立承受官奉冊入匣訖出笏提舉諸司  
官搢笏鎮匣訖出笏歸侍立位次讀光宗御集寧宗實  
錄光宗經武要略並同上儀次玉牒提舉官并進讀玉

牒官稍前立分進讀玉牒官於御前過西壁面東立玉  
牒提舉諸司官於玉牒匣前搢笏啓封鑰訖出笏歸侍  
立位玉牒承受官搢笏取冊授提舉官置御案上進讀  
亦如前儀讀畢鎖匣出笏歸侍立位次日曆提舉官并  
進讀日曆官啓封鑰進讀亦同俱畢入內宮徹案承受  
官奉冊入匣訖出笏提舉諸司官搢笏鑰匣訖出笏歸  
侍立位儀鸞司徹卓子降東朵殿奉書匣下殿各置腰  
輿上國史實錄院日曆所編脩經武要略所玉牒所提  
舉官禮儀使宰執並降東階下殿東壁面西立舍人引  
各官及禮儀使一班當殿面北立定引各直身出班斂

身稱謝訖歸位立揖躬身贊拜兩拜訖贊各祗候直身立宣答御藥下殿宣答提舉官禮儀使並斂身聽宣答訖御藥升殿揖躬身贊拜兩拜訖贊各祗候直身立舍人引赴東壁面西立次引國史實錄院日曆所編脩經武要略所玉牒所官一班首直身出班斂身稱謝訖歸位立揖躬身贊拜兩拜訖贊各祗候直身立如傳旨謝恩知閣門官承旨訖於折檻東面西立傳與舍人承旨訖再揖躬身贊謝恩拜兩拜訖贊各祗候直身立不該賜茶官先退次引國史實錄院日曆所編脩經武要略所玉牒所提舉諸司官并承受官以下一班當殿面北立定揖躬身贊謝恩拜兩拜訖贊各祗候直身立各歸位立次引國史實錄院日曆所編脩經武要略所玉牒所點檢文字以下一班當殿面北立定揖躬身贊謝恩拜兩拜訖贊各祗候直身立各歸位立傳旨宣坐賜茶訖舍人奏閣門無公事皇帝起還宮百官導送奏安兩朝御集實錄於天章閣經武要略於經武閣玉牒於玉牒所日曆於祕閣如儀大射之禮廢於五季太宗始命有司草定儀注其羣臣朝謁如元會酒三行有司言請賜王公以下射侍中稱制可皇帝改服武弁布七埒於殿下王公以次射開樂

縣東西廂設熊虎等侯陳賞物於東階以賚能者設豐  
爵於西階以罰否者并圖其冠冕儀式表著埒埒之位  
以進帝覽而嘉之謂宰臣曰侯彘兵當與卿等行之凡  
游幸池苑或命宗室武臣射每帝射中的從官再拜奉  
觴貢馬爲賀預射官中者帝爲之解賜襲衣金帶散馬  
不解則不賜苑中皆有射棚晝暈的射則用招箭班三  
十人服緋紫繡衣帽首分立左右以唱中否節序賜宴  
則宗室禁軍大校牧伯諸司使副皆令習射遂爲定制  
外國使入朝亦令帥臣伴賜射於園苑政和宴射儀皇  
帝御射殿侍宴官公服繫鞵射官窄衣奏聖躬萬福再  
拜升殿酒三行引射官降皆執弓矢謝恩再拜三公以  
下在右射官在左不射者依坐次分立皇帝初射中舍  
人贊拜凡左右祇應臣僚除內侍外並階上下再拜行  
門禁衛諸班親從諸司祇應人並自贊再拜招箭班殿  
上躬奏訖跪進梳射官先傳弓箭與殿侍側立內侍接  
梳訖就拜起降階再拜有司進御茶牀天武引進奉馬  
列射梁前員僚奏聖躬萬福東上閣門官詣御前躬奏  
班首姓名以下進酒班首以下橫行立贊再拜班首奉  
酒進樂作飲畢殿上臣僚再拜舍人贊各賜酒羣官俱  
再拜贊各就坐羣官皆立席後引進司官臨階宣進奉

出天武奉馬出樂合復贊就坐飲訖揖興諸司收坐物  
等射官左側躡階取弓箭侍立皇帝再射中的或雙中  
如上儀進酒臨時取旨得旨進酒更不進奉中扁椀及  
解中更不賀不進酒臣僚射中別降階再拜訖殿下側  
立御箭解中招箭班進椀如上儀舍人再引射中官當  
殿揖躬宣有敕賜窄衣金帶跪受箱過再拜過殿側服  
所賜訖再引當殿再拜更不射如宣再射或更賜箭令  
射如未退卽就位再拜如再射中御箭再解中賜鞍轡  
馬如上儀臣僚射中御箭不解引降階再拜立招箭班  
殿上躬奏訖下殿舍人宣有敕賜銀椀跪受執椀并箭  
就拜起再拜如合賜散馬卽同宣賜宣有敕賜銀椀兼  
賜散馬若干匹射訖進御茶床諸司復陳坐物等羣官  
各立席後贊就坐羣臣俱坐酒五行宣示醖宣勸如儀  
皆作樂宴畢內侍舉御茶床三公以下降階再拜退乾  
道二年二月四日車駕幸玉津園皇帝射訖次命皇太  
子次慶王次恭王次管軍臣僚等射如是者三每射四  
發帝前後四中的淳熙元年九月車駕幸玉津園命從  
駕文武官行宴射之禮皇太子宰執以下酒三行樂作  
皇帝臨軒有司進弓矢皇帝中的皇太子進酒宰宰執  
以下再拜稱賀宣皇太子射射中賜宣預射臣僚射使



相鄭藻起居舍人王卿月環衛官蕭奪里懶射中各賜襲衣金帶

鄉飲之禮有三周禮鄉大夫三年大比興賢者能者鄉老及鄉大夫帥其吏與其衆寡以禮賓之一也黨正國索鬼神而祭祀則禮屬民而飲酒于序以正齒位二也州長春秋習射于序先行鄉飲禮三也後世臘蜡百神春秋習射序賓飲酒之儀不行於郡國進貢士日設鹿鳴宴猶古者賓興賢能行鄉飲之遺禮也然古禮有賓主僕介與今之禮不同器以尊俎與今之器不同賓坐於西北介坐於西南主人坐東南僕坐東北與今之位不同主人獻賓賓酢主人主人酬賓次主人獻介介酬主人次主人獻衆賓與今之儀不同今制州軍貢士之月以禮飲酒且以知州軍事爲主人學事司所在以提舉學事爲主人其次本州官八行上舍生當貢者與州之羣老爲衆賓亦古者序賓養老之意也是月也會凡學之士及武士習射亦古者習射于序之意也唐貞觀所放禮惟明州獨存淳化中會例行之政和禮局定飲酒祭降之節與舉酒作樂器用之屬並參用辟廱宴貢士儀其有古樂處令用古樂旣又以河北轉運判官張孝純之言周官以六藝教士必射而後行古者諸侯貢

士天子試諸射宮請詔諸路州郡每歲宴貢士於學因講射禮於是禮官參定射儀鄉飲酒前一日本州於射亭東西序量地之宜設提舉學事諸監司知州通判州學教授應赴鄉飲酒官貢士幕次本州兵馬教諭備弓矢應用物設樂其日初筵提舉學事知州軍通判帥應赴鄉飲酒官貢士詣射亭執弓矢揖人射乘矢若中則守帖者舉獲唱獲執筭者以筭投壺畢多筭勝少筭射畢贊者贊揖酬酢如儀畢揖退飲如鄉飲酒紹興七年郡守仇念置田以供費十三年比部郎中林保乞脩定鄉飲儀制遍下郡國於是國子祭酒高闕草具其儀上

之僕介之位皆與古制不合諸儒莫解其指意慶元中朱熹以儀禮改定知學者皆尊用之主賓僕介之位始有定說其主則州以守縣以令位于東南賓以里居年高及致仕者位于西北僕則州以倅縣以丞或簿位東北介以次長位西南三賓以賓之次者司正以衆所推服者相及贊以士之熟於禮儀者其日質明主人率賓以下先釋菜于先聖先師退各就次以俟肅賓介與衆賓既入主人序賓祭酒再拜詣罍洗洗罍至酒尊所酌實罍授執事者至賓席前跪以獻賓賓酬主人主人酬介介酬衆賓賓主以下各就席坐訖酒再行次沃洗贊

者請司正揚解致辭司正復位主人以下復坐主人興復至阼階楹下僕從賓介復至西階下立三賓至西階立並南向主人拜賓介以下再拜賓介與衆賓先自西趨出主人少立自東出賓以下立于庠門外之右東鄉主人立于門外之左西鄉僕從主人再拜賓介以下皆再拜退

宋史卷一百一十四終

宋史卷一百一十五

禮志第六十八

開府儀同三司上柱國錄軍國軍事前書右丞相監脩國史領經筵事都總裁脫脫等脩

皇明朝列大夫國子監祭酒臣方從哲

勅重較刊 承德郎右春坊右中允國子監司業事臣黃汝良等奉

皇明朝列大夫國子監祭酒臣吳士元 承德郎司業仍加俸一級臣黃 錦等奉 旨重修

禮十八 嘉禮六

皇太子冠禮皇太子

公子下降降儀宗室附 公主笄禮 親王納妃

命官婚禮 士庶人婚禮

皇太子冠儀嘗行於大中祥符之八年徽宗親製冠禮沿革十一卷命儀禮局倣以編次其儀前期奏告天地

宗廟社稷諸陵宮觀殿中監帥尚舍張設垂拱文德殿門之內設香案殿下螭陛間又爲房於東及殿大晟展宮架樂於橫街南太常設太子冠席東階上東宮宮位於後設褥位陳服於席南東領北上遠遊冠簪導衮冕簪導同箱在服南設盥洗阼階東壘在洗東篚在洗西實巾一加勺纂光祿設醴席西階上南面實側尊在席南又設饌于席加纂執事者並公服立盥洗酒饌之所九旒冕遠遊冠折上巾各一匱奉禮郎三人執以待於東階之東西北上設典儀位於宮架東北贊者二人在南西向禮直官通事舍人太常博士引太子詣朵殿東

房皇帝乘輦駐垂拱殿百官起居如月朔視朝儀左輔版奏中嚴內外符寶郎奏寶先出左輔奉外辦皇帝服通天冠絳紗袍詣文德殿簾捲大樂正令撞黃鐘之鐘右五鐘皆應殿上鳴鞭皇帝出西閣乘輦協律郎俛伏跪舉麾興工鼓祝奏乾安之樂殿上扇合禮直官太常博士引禮儀使導皇帝出降輦卽坐簾捲扇開鞭鳴樂上爐煙升符寶郎奉寶陳於御坐左右禮直官通事舍人太常博士引掌冠贊冠者入門肅安之樂作至位樂止典儀曰再拜在位者皆再拜左輔詣御坐前承制降東階詣掌冠者前西向稱有制典儀贊在位官再拜訖

宋史卷二百五十五

禮志

宣制曰皇太子冠命卿等行禮掌冠贊冠者再拜訖文  
臣侍從官宗室武臣節度使以上升殿東西立應行禮  
官詣東階下立東宮官入詣太子東房次禮直官等引  
太子內侍二人夾侍東宮官後從欽安之樂作卽席西  
向坐樂止引掌冠贊冠者以次詣盥洗樂作搢笏盥  
訖出笏升樂止執折上巾者升掌冠者降一等受之右  
執項左執前進皇太子席前北向立祝曰咨爾元子肇  
冠於昨筮日擇賓德成禮具於萬斯年承天之祐乃跪  
冠順安之樂作掌冠者與席南北面立後準此贊冠者  
進席前北面跪正冠興立於掌冠者之後太子與內侍  
跪進服服訖樂止掌冠者揖太子復坐禮直官等引掌  
冠者降詣盥洗如上儀贊冠者進席前北向跪脫折上  
巾置于匱與內侍跪受興置于席執遠遊冠者升掌冠  
者降二等受之右執項左執前進太子席前北向立祝  
曰爰卽令辰申加元服崇學以讓三善皆得副予一人  
受天百福乃跪冠懿安之樂作掌冠者興贊冠者進跪  
簪結紘興太子與內侍跪進服服訖樂止掌冠者揖太  
子復坐掌冠者降詣盥洗及贊冠者跪脫遠遊冠並如  
上儀執袞冕者升掌冠者降三等受之右執項左執前  
進太子席前北向立祝曰三加彌尊國本以正無疆惟

休有室大競懋昭厥德保茲永命乃跪冠成安之樂作  
 掌冠者興贊冠者如上儀跪簪結紘內侍進服服訖樂  
 止禮直官等引太子降自東階樂作由西階升即醴席  
 南向坐樂止又引掌冠者詣盥洗樂作盥訖升西階  
 樂止贊冠者跪取爵內侍注酒掌冠者受爵跪進太子  
 席前北向立祝曰旨酒嘉薦有飶其香拜受祭之以定  
 爾祥令德壽豈日進無疆太子稽圭跪受爵正安之樂  
 作飲訖奠爵執圭太官令設饌席前太子稽圭食訖樂  
 止執圭興大官令徹饌爵禮直官等引自西階詣東房  
 易朝服降立橫街南北向東宮官復位西向

太子初行樂作至位

禮直官等引掌冠贊冠者詣前西向掌冠者少進字  
 之曰始生而名為實之寔既冠而字以益厥文永受保  
 之承天之慶奉敕字某太常博士請再拜太子再拜訖  
 搢笏舞蹈再拜奏聖躬萬福又再拜左輔承旨降自東  
 階詣太子前西向宣曰有敕太子再拜宣敕曰事親以  
 孝接下以仁遠佞近義祿賢使能古訓是式大猷是經  
 宣訖太子再拜訖禮直官等引太子前俛伏跪奏稱臣  
 雖不敏敢不祗奉奏訖興復位再拜訖引出殿門樂作  
 出門樂止侍立官並降復位典儀曰拜贊者承傳在位  
 者皆再拜禮儀使奏禮畢鳴鞭大樂正令撞筵賓之鐘

左五鐘皆應乾安之樂作皇帝降坐左輔奏解嚴放仗  
在位官皆再拜退太子入內朝見皇后如宮中儀迺擇  
日謁太廟別廟宿齋於本宮質明服遠遊冠朱明衣乘  
金輅至廟改服衮冕執圭行禮羣臣稱賀皇帝賜酒三  
行

皇子冠前期擇日奏告景靈宮太常設皇子冠席文德  
殿東階上稍北東向設褥席陳服工席南東領北上九  
旒冕服七梁進賢冠服折上巾公服七梁冠簪導九旒  
冕簪導同箱在服南設盥洗酒饌旒冕冠巾及執事者  
並如皇太子儀其日質明皇帝通天冠絳紗袍御文德

殿皇子自東房出內侍二人夾侍王府官從恭安之樂  
作卽席南向坐樂止掌冠者進折上巾北向跪冠脩安  
之樂作贊冠者進北面跪正冠皇子興內侍跪進服訖  
樂止掌冠者揖皇子復坐以爵跪進祝曰酒禮和旨邊  
豆靜嘉授爾元服兄弟具來永言保之降福孔皆皇子  
搢笏跪受爵翼安之樂作飲訖太官令進饌訖再加七  
梁冠進安之樂作掌冠者進爵祝曰賓贊既成肴核惟  
旅申加厥服禮儀有序允觀爾成承天之祐皇子跪受  
爵輔安之樂作太官奉饌三加九旒冕廣安之樂作掌  
冠者進爵祝曰旨酒嘉粟甘薦令芳三加爾服眉壽無

疆永承天休俾熾而昌皇子跪受爵賢安之樂作太官奉饌饌徹皇子降易朝服立橫階南北向位掌冠者字之曰歲日云吉威儀孔時昭告厥字君子攸宜順爾成德永受保之奉敕字某皇子再拜舞蹈又再拜奏聖躬萬福又再拜左輔宣敕戒曰好禮樂善服儒講藝蕃我王室友于兄弟不溢不驕惟以守之皇子再拜進前俛伏跪稱臣雖不敏敢不祗奉俛伏興復位再拜出殿上侍立官並降復位再拜放仗明日百僚詣東上閤門賀

公主笄禮年十五雖未議下嫁亦笄笄之日設香案於殿庭設冠席於東房外坐東向西設醴席於西階上坐西向東設席位於冠席南西向其裙背大袖長裙褕翟之衣各設於櫺陳于庭冠笄冠及九翬四鳳冠各置于槃蒙以帕首飾隨之陳于服櫺之南執事者三人掌之櫺總置于東房內執事宮嬪盛服旁立俟樂作奏請皇帝升御坐樂止提舉官奏曰公主行笄禮樂作贊引公主入東房次行尊者為之總髻畢出即席西向坐次引掌冠者東房西向立執事奉冠笄以進掌冠者進前一步受之進公主席前北向立樂止祝曰令月吉日始加元服棄爾幼志順爾成德壽考綿鴻以介景福祝



畢樂作東向冠之冠畢席南北向立贊冠者爲之正冠  
施首飾畢揖公主適房樂止執事者奉裙背入服畢樂  
作公主就醴席掌冠者揖公主坐贊冠者執酒器執事  
者酌酒授於掌冠者執酒北向立樂止祝曰酒醴和旨  
籩豆靜嘉受爾元服兄弟具來與國同休降福孔皆祝  
畢樂作進酒公主飲畢贊冠者受酒器執事者奉饌食  
訖徹饌復引公主至冠席坐樂止贊冠者至席前贊冠  
者脫冠置于槃執事者徹去樂作執事者奉冠以進掌  
冠者進前二步受之進公主席前北向立樂止祝曰吉  
月令辰乃申爾服飾以威儀淑謹爾德眉壽永年享受

遐福祝畢樂作東向冠之冠畢席南北向立贊冠者爲  
之正冠施首飾畢揖公主適房樂止執事奉大袖長裙  
入服畢樂作公主至醴席掌冠者揖公主坐贊冠者執  
酒器執事者酌酒授于掌冠者執酒北向立樂止祝曰  
賓贊旣戒殺核惟旅申加爾服禮儀有序允觀爾成享  
天之祐祝畢樂作進酒公主飲畢贊冠者受酒器執事  
者奉饌食訖徹饌復引公主至冠席坐樂作贊冠者至  
席前贊冠者脫冠置于槃執事者徹去樂作執事奉几  
罍四鳳冠以進掌冠者進前三步受之進公主席前向  
北而立樂止祝曰以歲之吉以月之令三加爾服保茲

永命以終厥德受天之慶祝畢樂作東向冠之冠畢席  
 南北向立贊冠者為之正冠施首飾畢揖公主適房樂  
 止執事者奉綸翟之衣入服畢樂作公主至醴席掌冠  
 者揖公主坐贊冠者執酒器執事者酌酒授于掌冠者  
 執酒北向立樂止祝曰旨酒嘉薦有飶其香咸加爾服  
 眉壽無疆永承天休俾熾而昌祝畢樂作進酒公主飲  
 畢贊冠者受酒器執事者奉饌食訖徹饌復引公主至  
 席位立樂止掌冠者詣前相對致辭曰歲日具吉威儀  
 孔時昭告厥字令德攸宜表爾淑美永保受之可字曰  
 某辭訖樂作掌冠者退引公主至君父之前樂止再拜

起居謝恩再拜少俟提舉進御坐前承旨訖公主再拜  
 提舉乃宣訓辭曰事親以孝接下以慈和柔正順恭儉  
 謙儀不溢不驕毋詖毋欺古訓是式爾其守之宣訖公  
 主再拜前奏曰兒雖不敏敢不祗承歸位再拜見后母  
 之禮如之禮畢公主復坐皇后稱賀次妃嬪稱賀次掌  
 冠贊冠者謝恩次提舉眾內臣稱賀其餘班次稱賀並  
 依常式禮畢樂作駕興樂止

公主下降初被選尚者即拜駙馬都尉賜玉帶襲衣銀  
 鞍勒馬采羅百匹謂之繫親又賜辦財銀萬兩進財之  
 數倍於親王聘禮出降賜甲第餘如諸王夫人之制掌

扇加四引障花燭籠各加十皆行舅姑之禮諸親遞加  
賜賚其縣主繫親以金帶賜辦財銀五千兩納財賜賚  
大率三分減其二宗室女特封郡君者又差降焉嘉祐  
初禮官言禮閣新儀公主出降前一日行五禮古者結  
婚始用行卜告以夫家采擇之意謂之納采問女之名  
歸卜夫廟吉以告女家謂之問名納吉今選尚一出朝  
廷不待納采公主封爵已行誕告不待問名若納成則  
既有進財請期則有司擇日宜稍依五禮之名存其物  
數俾知婚姻之事重而夫婦之際嚴如此亦不忘古禮  
之義也時充國公主下嫁李瑋詔賜出降日令夫家主

婚者具合用鴈幣王馬等物陳於內東門外以授內謁  
者進入內侍掌事者受唯馬不入神宗卽位詔以昔侍  
先帝恭聞德音以舊制士大夫之子有尚帝女者輒皆  
升行以避舅姑之尊豈可以富貴之故屈人倫長幼之  
序宜詔有司革之以厲風俗於是著爲令仍命陳國長  
公主行舅姑之禮駙馬都尉王師約更不升行公主見  
舅姑行禮自此始舊例長公主凡有表章不稱妾禮院  
議謂男子婦人凡於所尊稱臣若妾義實相對今宗室  
伯叔近臣悉皆稱臣卽公主理宜稱妾况家人之禮難  
施於朝廷請自大長公主而下凡上賤表各據國封稱

妾從王師約之請也康國公主下降太常寺言按令公主出降申中書省請皇后帥宮闈掌事人送至第外命婦從今請如命詔出降日婉儀帥宮闈掌事者送至第外命婦免從徽宗改公主為姬下詔曰在熙寧初有詔釐改公主郡主縣主名稱當時羣臣不克奉承近命有司稽考前世周稱王姬見於詩雅姬雖周姓考古立制宜莫如周可改公主為帝姬郡主為宗姬縣主為族姬其稱大長者為大長帝姬仍以美名二字易其國號內兩國者以四字其出降日壻家具五禮脩表如上儀太史局擇日告廟親迎前一日所司於內東門外量地之

宜西向設壻次其壻父黜子如上儀乃命之曰往迎肅雍以昭惠宗祐子再拜曰祗率嚴命又再拜降出乘馬至東華門內下馬禮直官引就次有司陳帝姬鹵簿儀仗於內東門外候將升厭翟車引壻出次於內東門外躬身西向掌事者執鴈內謁者奉鴈以進俟帝姬升車壻再拜先還第同牢其日初昏掌事者設巾洗各二於東階東南一於室北水在洗東尊於室中實四爵兩盃於篚壻至本第下馬以俟帝姬至降車贊者引壻揖之以入及寢門又揖導之升階入室盥洗掌事者布對位又揖帝姬皆即坐受醖三飲俱興再拜贊者徹酒見舅

姑夙興帝姬著花釵服褕翟以俟見贊者設舅姑位於  
堂上舅位於東姑位於西各服其服就位女相者引帝  
姬升自西階詣舅位前再拜贊者以棗棗授帝姬奉置  
舅位前舅卽坐贊者進徹以東帝姬退復位又再拜女  
相者引詣姑位前再拜贊者以暇脩授帝姬奉置姑位  
前姑卽坐贊者升徹以東帝姬退復位又再拜次醴婦  
盥饋饗婦如儀

諸王納妃宋朝之制諸王聘禮賜女家白金萬兩敵門

卽古之  
納采

用羊二十口酒二十壺綵四十匹定禮羊酒綵

各加十茗百斤頭巾段綾絹三十匹黃金釵釧四雙

條脫一副眞珠琥珀瓔珞眞珠翠毛玉釵朶各一副銷  
金生色衣各一襲金塗銀合二錦繡綾羅三百匹果槃  
花粉花窰眠羊卧鹿花餅銀勝小色金銀錢等物納財  
用金器百兩綵千匹錢五十萬錦綺綾羅絹各三百匹  
銷金繡畫衣十襲眞珠翠毛玉釵朶各一副函書一架  
纏束帛押馬函馬二十匹羊五十口酒五十壺繫羊酒  
紅絹百匹花粉花窰果盤銀勝羅勝等物親迎用塗金  
銀裝肩輿一行障坐障各一方團掌扇四引障花十樹  
生色燭籠十高髻釵插并童子八人騎分左右導扇輿  
其宗室子聘禮賜女家白金五千兩其敵門定禮納財

親迎禮皆減半遠屬族卑者又減之政和三年四月議  
禮局上皇子納夫人儀采擇使者曰奉制某王之儷屬  
子懿淑謹之重之使某行采擇之禮儷者入告主人曰  
臣某之子顓愚不足以備采擇恭承制命臣某不敢辭  
問名使者曰某王之儷采擇既諧將加官占奉制問名  
儷者入告主人曰制以臣某之子可以奉侍某王臣某  
不敢辭告吉使者曰官占既吉奉制以告儷者入告主  
人曰臣某之子愚弗克堪占貺之吉臣與有幸臣某謹  
奉典制告成使者曰官占云吉嘉偶既定制使某以儀  
物告成儷者入告主人曰奉制使臣以重禮臣某謹奉

典制告期使者曰消辰之良某月某日吉制使某告期  
儷者入告主人曰臣某謹奉典制前期太史局擇日奏  
告景靈宮賜告前一日主人設使者次如常儀使者以內侍爲  
之又設告箱之次於中門外北向隨闕所白設香案於  
寢庭其日大昕使者公服至主人出迎於大門外北向  
再拜使者不答拜謁者引使者入門而左主人入門而  
右舉告箱者同入主人立香案左使者在右舉告箱者  
以告置于香案女相者引夫人出面闕立使者稱有制  
女相者贊再拜使者曰賜某國夫人告又贊再拜退使  
者出皇帝醮戒於所御之殿皇子乘象輅親迎同牢夫

人朝見盥饋皇帝皇后饗夫人如儀其諸王以下納采

賓曰某官以伉儷之重施於某王某官謂主人某王率

循彝典以某將事敢請納采某王謂婿賓者入告主人

曰某之子弗閑於姆訓維是暇脩秦桑之饋未知所以

告虔也某聽命于廟敢不拜嘉問名賓曰合二姓之好

必稽諸龜筮敢請問名賓者入告主人曰某王恭謹重

正昏禮將以加諸卜某敢不以告納吉賓曰某王承嘉

命稽諸卜筮龜筮協從使某以告賓者入告主人曰某

王不忘寒素欲施德於某未教之女而卜以吉告其曷

敢辭納成賓曰某官以伉儷之重施於某王某王謂下

謂婿入告主人曰某王順彝典申之以備物某敢不重拜嘉

請期賓曰某王謹重嘉禮將卜諸近日使某請期賓者

入告主人再辭儻者出告賓曰某既不獲受命於某官

某王得吉卜曰某日敢不以告儻者入告主人曰謹奉

命以從親迎前一日主人設賓次賓謂如常儀其日大

昕壻之父服其服告於禰廟無廟者設神位於廳子將

行父醮之於廳事贊者設父位中間南向設子位父位

之西近南東向父即坐子公服升自西階進立位前贊

者注酒於醴西向授子子再拜跪受贊者又設饌父位

前子舉酒與卽坐飲食訖降再拜進立於父位前命之  
曰躬迎嘉偶釐爾內治子再拜曰敢不奉命又再拜降  
出詣女家主人服其服告於禰廟如請期之儀賓將至  
主人設神位於寢戶外之西設醴女位於戶內南向具  
酒征賓至贊者引就次女盛服於房中就位南向立姆  
位於右從者陪其後父公服升自東階立於寢戶外之  
東西向內贊者設酒饌女就位坐飲食訖降再拜內贊  
者徹酒饌主人降立東階東南西面贊者引賓出次立  
於門西東面儻者進受命出請事實曰某受命於父以  
茲嘉禮躬聽成命儻者入告主人曰某固願從命儻者

出告訖入引主人迎賓大門外之東西面揖賓賓報揖  
主人入門而右賓入門而左執鴈者從入陳鴈於庭三  
分庭一在南北向主人升立于東階上西面賓升西階  
進當寢戶前北面再拜降出主人不降送賓初入門母  
出立於寢戶外之西南面賓拜訖姆引女出於母左父  
命之曰往之汝家以順爲正無忘肅恭母戒之曰必恭  
必戒無違舅姑之命庶母申之曰爾誠聽於訓言母作  
父母羞女出門婿先還第其同牢廟見見舅姑諸禮皆  
如儀凡宗室婚姻治平中宗正司言宗室女舅姑夫族  
未立儀制皆當勅法詔婿家有二世食祿卽許娶宗室



女未仕者與判司簿尉已任者隨資序推恩卽壻別祖  
女別房舊爲婚姻而於今卑尊不順者皆許壻之三代  
鄉貫生月人材書劄止令婚主問驗以告宗正寺大宗  
正司寺司詳視如條保明所進財皆賜壻家令止於本  
官納財媒妁使令之人非理求勾許告宗室女事舅姑  
及見夫之族親皆如臣庶之家其後又令宗室女再嫁  
者祖父有二代任殿直若州縣官已上卽許爲婚姻熙  
寧十年又詔應袒免以上親不得與雜類之家婚嫁謂  
舅嘗爲僕姑嘗爲娼者若父母係化外及見居沿邊兩  
屬之人其子孫亦不許爲婚總麻以上親不得與諸司

胥吏出職納粟得官及進納伎術工商雜類惡逆之家

子孫通婚

後又禁刑徒  
人子孫爲婚

應婚嫁者委主婚宗室擇二代

有任州縣官或殿直以上者列姓名家世州里歲數奏  
上宗正司驗實召保付內侍省宣繫聽期而行嫁女則  
令其壻召保其冒妄成婚者以違制論主婚宗室與媒  
保同坐不以赦降自首者減罪告者有賞非袒免親者  
依庶姓法宗室離婚委宗正司審察若於律有可出之  
實或不相安方聽若無故裙捨者劾奏如許聽離追完  
賜予物給還嫁資再娶者不給賜非袒免以上親與夫  
聽離再嫁者委宗正司審核其恩澤已追奪而乞與後

夫者降一等尋詔宗女毋得與嘗娶人結婚再適者不用此法

品官婚禮納采問名納吉納成請期親迎同牢廟見見舅姑姑醴婦盥饋饗婦送者並如諸王以下婚四品以下不用盥饋饗婦禮

士庶人婚禮并問名於納采并請期於納成其無鴈奠者三舍生聽用羊庶人聽以雉及鷄鶩代其辭稱吾子親迎質明掌事者設禰位廳事東間南向壻之父服其服北面再拜祝曰某子某年若干禮宜有室聘某氏第幾月以某日親迎敢告子將行父坐廳事南向子服其

服

三舍生及品官子孫假九品服餘並皂衫衣折上中

立父位西少南東向贊者

注酒於醴授子子再拜跪受贊者又以饌設位前子舉

酒與卽坐飲食訖降再拜進立父位前命之曰釐爾內

治往求爾匹子再拜曰敢不奉命又再拜降出初婚掌

事者設酒饌室中置二醴於槃壻服其服如前服至女

家贊者引就次掌事者設禰位主人受禮如請期之儀

主人謂女父

女盛服立房中父升階立房外之東西向

非南向者

各隨其所向父立於門外之左餘放此贊者注酒於醴授女女再拜受醴

贊者又以饌設於位前女卽坐飲食訖降再拜父降立

東階下賓出次

賓謂壻

主人迎于門揖賓入賓報揖從入

主人升東階西面賓升西階進當房戶前北面掌事者  
陳薦于階賓曰某受命於父以茲嘉禮躬聽成命主人  
曰某固願從命賓再拜降出主人不降送初女出父戒  
之曰往之汝家無妄肅恭毋戒之曰夙夜以思無有違  
命諸母申之曰無違爾父母之訓女出壻先還俟于門  
外婦至贊者引就北面立壻南面揖以入至於室掌事  
者設對位室中壻婦皆卽坐贊者注酒於醴授壻及婦  
壻及婦受醴飲訖迎設饌再飲三飲並如上儀壻及婦  
皆與再拜贊者徹酒饌見祖禰見舅姑禮婦饗送者如  
儀

宋史卷一百十五終

宋史卷一百十六

禮志第六十九

開府儀同三司在國錄軍國軍事前中書右丞相監脩國史領廷事都總裁脫脫等脩

皇明朝列大夫國子監祭酒臣方從哲

勅重較刊 承德郎右春坊右中允管國子監司業事臣黃汝良等奉

皇明朝列大夫國子監祭酒臣吳士元 承德郎司業仍加俸一級臣黃錦等奉

禮十九 賓禮一

大朝會儀 常朝儀

周官司儀掌九儀賓客擯相詔王南鄉以朝諸侯大行人  
掌大賓之禮大客之儀以親諸侯蓋君臣之際體統  
雖嚴然而接以仁義攝以威儀實有賓主之道焉是以

小雅鹿鳴燕其臣下皆以嘉賓稱之宋之朝儀政和詳  
定五禮列爲賓禮今脩宋史存其舊云

大朝會宋承前代之制以元日五月朔冬至行大朝會  
之禮太祖建隆二年正月朔始受朝賀於崇元殿服袞  
冕設宮縣作衛如儀仗退羣臣詣皇太后宮門奉賀帝  
常服御廣德殿羣臣上壽用教坊樂五月朔受朝賀於  
崇元殿帝服通天冠絳紗袍宮縣儀仗如元會儀乾德  
三年冬至受朝賀於文明殿四年於朝元殿賀畢常服  
御大明殿羣臣上壽始用雅樂登歌二舞羣臣酒五行  
罷太宗淳化三年正月朔命有司約開元禮定上壽儀

皆以法服行禮設宮縣萬舞酒三行罷真宗咸平三年  
五月朔雨命放仗百官常服起居於長春殿退詣正衙  
立班宣制仁宗天聖四年十二月詔明年正月朔先率  
百官赴會慶殿上皇太后壽酒畢乃受朝天安殿仍令  
太常禮院脩定儀制五年正月朔曉漏未盡三刻宰臣  
百官與遼使諸軍將校並常服班會慶殿內侍請皇太  
后出殿後幄鳴鞭升坐又詣殿後皇帝幄引皇帝出帝  
服鞞袍於簾內北向褥位再拜跪稱臣某言元正啓祚  
萬物惟新伏惟尊號皇太后陛下膺時納祐與天同休  
內常侍承旨答曰履新之祐與皇帝同之帝再拜詣皇

太后御坐稍東內給侍酌酒授內謁者監進帝跪進訖以盤與內謁者監承接之帝却就褥位跪奏曰臣某稽首言元正令節不勝大慶謹上千萬歲壽再拜內常侍宣答曰恭舉皇帝壽酒帝再拜執盤侍立教坊樂止皇帝受虛醖還幄通事舍人引百官橫行典儀贊再拜舞蹈起居太尉升自西階稱賀簾外降還位皆再拜舞蹈侍中承旨曰有制皆再拜宣曰履新之吉與公等同之皆再拜舞蹈閣門使簾外奏宰臣某以下進壽酒皆再拜太尉升自東階翰林使酌御酒盞授太尉執盞盤跪進簾外內謁者監跪接以進太尉跪奏曰元正令節臣等不勝慶抃謹上千萬歲壽降還位皆再拜宣徽使承旨曰舉公等觴皆再拜太尉升立簾外樂止內謁者監出簾授虛盞太尉降階橫行皆再拜舞蹈宣徽使承旨宣羣臣升殿再拜升及東西廂坐酒三行侍中奏禮畢退樞密使以下迎乘輿於長春殿起居稱賀百官就朝堂易朝服班天安殿朝賀帝服衮冕受朝禮官通侍舍人引中書令門下侍郎各於案取所奏文詣褥位脫劔舄以次升分東西立諸方鎮表祥瑞案先置門外左右令使絳衣對舉給侍中押祥瑞中書侍郎押表案入分詣東西階下對立既賀更服通天冠絳紗袍稱觴上壽

止舉四爵乘輿還內恭謝太后如常禮神宗元豐元年  
詔龍圖閣直學士史館脩撰宋敏求等詳定正殿御殿  
儀注敏求遂上朝會儀二篇令式四十篇詔頒行之其  
制元正冬至大朝會有司設御坐大慶殿東西房于御  
坐之左右少北東西閣于殿後百官宗室客使次于廟  
堂之內外五輅先陳于庭兵部設黃麾仗于殿之內外  
大樂令展宮架之樂于橫街南鼓吹令分置十二案于  
宮架外協律郎二人一位殿上西階之前楹一位宮架  
西北俱東向陳輿輦御馬于龍墀繳扇于沙墀貢物于  
宮架南冬至不設貢物餘則列大慶門外陳布將士于街左右

金吾六軍諸衛勅所部列黃麾大仗于門及殿庭百僚  
客使等俱入朝文武常參官朝服陪位官公服近仗就  
陳于閣外大樂令樂工協律郎入就位中書侍郎以諸  
方鎮表案給事中不設給事中以祥瑞案俟于大慶門外之左右冬至  
立祥瑞案諸侍衛官各服其器服輦出至西閣降輦  
符寶郎奉寶詣閣門奉迎百官客使陪位官俱入就位  
侍中版奏中嚴又奏外辦殿上鳴鞭宮縣撞黃鐘之鐘  
右五鐘皆應內侍承旨索扇扇合帝服通天冠絳紗袍  
御輿出協律郎舉麾奏乾安樂鼓吹振作帝出自西房  
降輿卽坐扇開殿下鳴鞭協律郎偃麾樂止爐煙升符

寶郎奉寶置御坐前中書侍郎給事中押表案祥瑞案  
入詣東西階下對立百官宗室及遼使班分東西以次  
入正安樂作就位樂止押樂官歸本班起居畢復案位  
三師親王以下及御史臺外正任遼使俱就北向位典  
儀贊在位者皆再拜起居訖太尉將升中書令門下侍  
郎俱降至西階下立凡大尉行則樂作至位樂止太尉詣西階下解  
劔脫烏升殿中書令門下侍郎各於案取所奏之文詣  
褥位解劔脫烏以次升分東西立以俟太尉詣御坐前  
北向跪奏文武百寮太尉具官臣某等言元正啓祚萬  
物咸新冬上至易為畧運推移也南長至伏惟皇帝陛下應乾納祐與天

同休俛伏興降階佩劔納烏餘官準此還位在位官俱再拜

舞蹈三稱萬歲再拜侍中進當御坐前承旨退臨階西

向稱制宣答曰履新之慶冬上至易曰履長之慶與公等同之贊者

曰拜舞蹈三稱萬歲橫行官分班立中書令門下侍郎

升詣御坐前各奏諸方鎮表及祥瑞訖戶部尚書就承

制位俛伏跪奏諸州貢物請付所司禮部尚書奏諸蕃

貢物如之司天監奏雲物祥瑞請付史館皆如上儀侍

中進當御坐前奏禮畢殿上承旨索扇殿下鳴鞭宮縣

撞蕤賓之鐘左五鐘皆應協律郎舉麾宮縣奏乾安樂

鼓吹振作帝降坐御輿入自東房扇開偃麾樂止侍郎

奏解嚴百官退還次客使陪位官並退有司設食案大  
樂令設登歌殿上二舞入立于架南預坐當升殿者位  
御坐之前文武相向異位重行以北爲上非升殿者位  
于東西廊下尚食奉御設壽尊于殿東楹少南設坫于  
尊南加爵一有司設上下羣臣酒尊殿下東西廂侍衛  
官及執事者各立其位仗衛仍立俟上壽百官立班如  
朝賀儀侍中版奏中嚴外辦聞鳴鞭索扇帝服通天冠  
絳紗袍御輿出東房樂作帝卽坐扇開樂止贊拜畢光  
祿卿詣橫街南跪奏具官臣某言請允羣臣上壽與侍  
中承旨稱制可少退舍人曰拜光祿卿再拜訖復位三  
師以下就位贊者曰拜在位者皆拜舞三稱萬歲太尉  
升殿詣壽尊所北向尚食奉御酌御酒一爵授太尉搯  
笏執爵詣前跪進帝執爵太尉出笏俛伏興少退跪奏  
文武百寮太尉具官臣某等稽首言元正首祚臣等不  
勝大慶謹上千萬壽俛伏興降復位贊者曰拜在位者  
皆再拜三稱萬歲侍中承旨退西向宣曰舉公等觴贊  
者曰拜在位者皆再拜三稱萬歲北向班分東西序立  
太尉自東階侍立舉第一爵和安樂作飲畢樂止太尉  
受虛爵復於坫降階三師以下贊拜舞蹈稱萬歲如上  
儀侍中進奏侍中具官臣某言請延公王等升殿俛伏



興降復位侍中承旨退稱有制贊者曰拜在位者皆再拜宣曰延公等升殿贊者曰拜在位者皆再拜公王等詣東階升立於席後尚食奉御進酒殿中監省酒以進帝舉第二爵登歌作甘露之曲飲訖殿中監受爵樂止羣臣升殿就橫行位舍人曰各賜酒贊者曰拜羣官皆再拜三稱萬歲舍人曰就坐太官令行酒搢笏受酒宮縣作正安之樂文舞入立宮架北觴行一周凡行酒訖並太官令奏巡周樂止尚食進食升階以次置御坐前又設羣官食訖太官令奏食徧太樂丞引盛德升聞之舞入作三變止出殿中監進第三爵羣官立席後登歌

作瑞木成文之曲飲訖樂止殿中丞受虛爵舍人曰就坐羣官皆坐又行酒作樂進食如上儀太樂丞引天下大定之舞作三變止出殿中監進第四爵登歌奏嘉禾之曲如第三爵太官令行酒又一周樂止舍人曰可起百寮皆立席後侍中進御坐前跪奏禮畢俛伏興與羣官俱降階復位贊者曰拜皆再拜舞蹈三稱萬歲起分班立殿上索扇扇合殿下鳴鞭太樂令撞鞀賓之鐘左右鐘皆應協律郎俛伏舉麾太樂令奏乾安之樂鼓吹振作帝降坐御輿入自東房扇開樂止侍中奏解嚴所司承旨放仗百寮再拜相次退舊制朝賀上壽帝執

鎮圭至是始罷不用元祐八年太常博士陳祥道言貴人賤馬古今所同故觀禮馬在庭而侯氏升堂致命聘禮馬在庭而賓升堂私覲今元會儀御馬立於龍墀之上而特進以下立於庭是不稱尊賢才體羣臣之意請改儀注以御馬在庭於義爲允舊制五月朔受朝熙寧二年詔罷之元符元年四月得傳國受命寶禮官言五月朔於故事當大朝會乞就是日行受寶之禮依上尊號寶冊儀前一日帝齋于殿內翼日服通天冠絳紗袍御大慶殿降坐受寶羣臣上壽稱賀其後徽宗以元日受八寶及定命寶冬至日受元圭皆于大慶殿行朝賀禮新儀成改元豐儀太尉爲上公侍中爲左輔中書令爲右弼太樂令爲大晟府盛德升聞爲天下化成之舞天下大定爲四夷來王之舞及增刑部尚書奏天下斷絕請付史館餘並如舊儀凡遇國恤則廢若無事不視朝則下敕云不御殿羣臣進表稱賀于閣門紹興十二年十月臣僚言竊以元正一歲之首冬至一陽之復聖人重之制爲朝賀之禮焉自上世以來未之有改也漢高祖以五年卽位而七年受朝于長樂宮我太祖皇帝以建隆元年卽位受朝于崇元殿主上臨御十有六年正至朝賀初未嘗講艱難之際宜不遑暇茲者太母還

宮國家大慶四方來賀宜惟其時欲望自今元正冬至  
舉行朝賀之禮以明天子之尊庶幾舊典不至廢墜禮  
部太常寺考定朝會之禮依國故事設黃麾大仗車輅  
法物樂舞等百寮服朝服再拜上壽宣王公升殿間飲  
三周詔自來年舉行十一月權禮部侍郎王賞等言朝  
會之制正旦冬至及大慶受朝受賀係御大慶殿其文  
德紫宸垂拱殿禮制各有不同月朔視朝則御文德殿  
謂之前殿正衙仍設黃麾半役紫宸垂拱皆係側殿不  
設儀仗元正在近大慶殿之禮事務至多乞候來年冬  
至別行取旨詔從之明年閣門言依汴京故事遇行大  
禮則冬至及次年正旦朝會皆罷十四年九月有司言  
明年正旦朝會請權以文德殿爲大慶殿合設黃麾大  
仗五千二十七人欲權減三分之一合設八寶於御坐  
之東西及登歌宮架樂舞諸州諸蕃貢物行在致仕官  
諸路貢士舉首並令立班詔從之十五年正旦御大慶  
殿受朝文武百官朝賀如儀

常朝之儀唐以宣政爲前殿謂之正衙卽古之內朝也  
以紫宸爲便殿謂之入閣卽古之燕朝也而外又有含  
元殿含元非正至大朝會不御正衙則日見羣臣百官  
皆在謂之常參其後此禮漸廢後唐明宗始詔羣臣每

五日一隨宰相入見謂之起居宋因其制皇帝曰御垂  
拱殿文武官日赴文德殿正衙日常參宰相一人押班  
其朝朔望亦於此殿五日起居則於崇德殿或長春殿  
中書門下為班首長春即垂拱也至元豐中官制行始  
詔侍從官而上日朝垂拱謂之常參官百司朝官以上  
每五日一朝紫宸為六參官在京朝官以上朔望一朝  
紫宸為朔參官望參官遂為定制

正衙常參國朝之制兩省臺官文武百官每日赴文德  
殿立班宰臣一員押班常朝官有詔旨免常朝及勾當  
更番宿者不赴遇假併三日以上即橫行參假宰臣參

知政事及免常朝者悉集

事務急速赴橫行不及者悉  
報臺如遇親王使相過正衙

則取別旨羣官見謝辭者皆赴正衙其日文武班尚書上將

軍以下並先叙立於殿門之外東西相向

文班一品二  
品不叙立

正衙見謝辭官立於大班之南右巡使立正衙位南北

向臺官大夫中丞三院御史各就揖班位再揖

三院不  
全即不

揖揖訖臺官與左巡使先入各就位

左右巡使立鐘鼓  
樓下左巡使奏武

班右巡使奏文班如只巡使一員即就入班南次兩班

及右巡使入次見謝辭官入次兩省官入

兩省官自殿  
西偏門入於

右勤政門北偏門立候文次文班一品二品入次宰臣

武班將至循午階就位

出東上閣門就位通事舍人一員立於閣門外北向西

色宮立其後舍人通承旨奉敕不坐四色言應喏急趨

至放班位宣敕在位官皆再拜而退其應橫行者班定

通事舍人揖羣官轉班北向舍人揖再拜復位如常朝

之儀兩省官幕次舊在中書門外近制凡見謝辭官新

加恩出使宰臣親王使相俟班定引贊引出東上閣門

階南中書門下正衙樞密使副使知院同知院簽書院

事參知政事宣徽使宗室節度使以下至刺史將軍俟

定四方館吏引出東上閣門至殿庭由東黃道赴正衙

位北向以西為首將軍以東為首正衙畢宰臣樞密出

西便門親王宗觀文殿大學士資政殿大學士觀文殿

學士三司使翰林資政侍講侍讀學士直學士知制誥

待制直學士以上集丞郎幕次待制集上將軍幕次俟

班定四方館吏引入殿西便門赴班於大夫中丞

前門下中書侍郎至正言四方館吏引先集勤政門北

出御史大夫至御史俟班定於一品二品官未就

僕射東宮三師二少班入殿門朝堂吏引入殿東尚書

丞郎左右金吾上將軍至將軍序班如節度使至刺史

軍職兩廂都指揮使以上三司副使文班京朝官武官

郎將以上分司官樞密都承旨諸使副醫官帶正員官

者並文東武西相向重其權三司使開封府吏部銓祕

書監脩撰直館閣校理檢討三司判官主判官開封府

判官推官官僚內職軍校領郡者內客省使至通事舍

萬曆二十七年刊

人節度行軍司馬至團練副使幕職上佐州縣官諸司

勒留官新受者京朝官改賜章服者致仕責授降授並

謝行軍副使仍辭京朝官貢舉發解畢者亦見準儀制知貢舉官合謝辭近歲

皆即時鎖宿故謝辭皆停

垂拱殿起居則內侍省都知押班率內供奉官以下并

寄班等先起居次客省閣門使以下呈進次三班使臣

節度觀察防禦團練刺史等子弟克供奉官侍禁殿直有皆令內朝起居者次內殿當直諸

班殿前指揮使左右班都虞候以下內殿直散員散旨為散都頭金槍班等次長入祗候東

西班殿侍次御前忠佐次殿前都指揮使率軍校至副

指揮使次駙馬都尉任刺史以上綴本班次諸王府僚次殿前

都軍使都頭次皇親將軍以下至殿直次行門指揮使

率行門起居以上並內侍贊喝如傳宣前殿不坐即宰相樞密

使文明殿學士三司使翰林樞密直學士中書舍人三

司副使知起居注皇城內監庫藏朝官諸司使副內殿

崇班供奉官侍禁殿直翰林醫官待詔等同班入次親

王侍衛親軍馬步軍都指揮使率軍校至副都指揮使

次使相次節度使次統軍次兩使留後觀察使次團練

防禦使刺史次侍衛馬步軍使都頭起居畢見謝班入

如御崇德殿即紫宸殿也即樞密使以下先就班候升坐諸

使副以下至殿直分東西對立餘皆北面長春殿階北面宰相參知政事最後入以上

並閣門 日止再拜朔望及三日假樞密使以下皆舞蹈

贊喝 早朝則宰相樞密宣徽使起居畢升殿問聖體宰相奏

事樞密宣徽使退候宰相對畢樞密使復入奏事次三

司開封府審刑院及羣臣以次登殿 大兩省以上領務京師有公事許即

時請對自餘受使出入要切者欲回奏事則聽先進取旨 其見謝辭官以次入于庭

凡見者先之謝次之辭又次之 出使閑慢或未升朝官或止拜於門外自祕書

監上將軍觀察使內以上得拜殿門階上及升殿止拜御坐前餘皆庭中班次 惟宰相親王使

相赴崇德殿即宣徽使通喚餘皆側立候通再拜舞蹈

致辭即不舞蹈見即將相升殿問聖體其賜分物酒食

及收進奉物皆舞蹈稱謝 凡收進奉物皆入謝 幕職州縣官謝辭

節判銓官引對兼於殿門外宣辭戒勵凡國有大慶瑞

及出師勝捷樞密使率內職軍校入賀致辭閣門使宣

答宰相致辭宣徽使宣答如賜酒即預坐官後入作樂

送酒如曲宴之儀晚朝則宰相樞密翰林學士當直者

洎近侍執事之臣皆赴乾德六年九月始以旬假日御

講武殿 又名近臣但赴早參宰相以下鞞笏諸司使以下繫帶 其節假

及大祀並令如式開寶九年四月詔旬休日不視事及

太宗即位復如舊視朝退進食訖則易服御崇政殿先

羣臣告謝次軍頭引見司奏事于殿下次三班審官院

流內銓刑部及諸司引見官吏如假日起居辭見畢即

移御坐臨軒視事既退復有奏事或閱器物之式者謂  
之後殿再坐淳化三年令有司申舉十五條常參文武  
官或有朝堂行私禮跪拜待漏行立失序談笑喧嘩入  
正衙門執笏不端行立遲緩至班列行立不正趨拜失  
儀言語微喧穿班仗出閣門不卽就班無故離位廊下  
食行坐失儀入朝及退朝不從正衙門出入非公事入  
中書犯者奪奉一月有司振舉拒不伏者錄奏貶降景  
德二年光祿寺丞錢易言竊覩文德殿常朝班不及三  
四十人蓋以凡掌職務止赴五日起居頗違舊章望令  
並赴朝參乃詔應三館祕書閣尚書省二十四司諸司

寺監朝臣內殿起居外並赴文德殿常參其審刑院大  
理寺臺直官開封府判官推官司錄兩縣司天監翰林  
天文監倉場庫務等仍免大中祥符二年御史知雜趙  
湘言伏見常參官每日趨朝多不整肅舊制並早赴待  
漏院候開內門齊入伏緣每日追辰以朝以故後時方  
入又風雨寒暑卽多稱疾宜令知班驅使官視其入晚  
者申奏疾者遣醫親視天禧四年十月中書門下言唐  
朝故事五日一開延英隻日視事隻日不坐方今中外  
晏寧政刑清簡望準舊事三日五日一臨軒聽政隻日  
視事隻日不坐至於刑章錢穀事務遣差臣僚除急切



大事須面對外餘並令中書樞密院附奏詔禮儀院詳定雙日前後殿不坐隻日視事或於長春殿或於承明殿應內殿起居羣臣並依常日起居餘如中書門下之儀儀又請隻日承明殿常朝依假日便服視事不鳴鞭詔可康定初詔中書樞密三司大節大忌給假一日小節旬休並後殿奏事前後毋得過五班餘聽後殿對御廚給食假日崇政殿辰漏上入內進食俟再坐復對神宗卽位御史中丞王陶以皇祐編敕宰臣押班儀制移中書謂天子新卽位大臣不應隳廢朝儀不報舊制祖宗以來日御垂拱殿待制諸司使以上俱赴而百官班

文德殿曰常朝五日皆入日起居平時宰相垂拱殿奏事畢赴文德殿押班或日昃未退則閣門傳宣放班多不復赴王陶以韓琦曾公亮違故事不押班爲不恭劾之琦公亮上表待罪且言唐及五代會要月九開延英則餘日宰相當押正衙班及延英對日未御內殿前傳宣放班則宰相不押正衙班明矣自祖宗繼日臨朝宰相奏事至祥符初始詔循故事押文德班以妨職浸廢乃至今日請下太常禮院詳定陶坐絀司馬光代爲中丞請令宰相遵國朝舊制押班不須詳定尋詔宰相春分辰初秋分辰正垂拱殿未退聽勿赴文德殿令御史

臺放班光又言垂拱奏事畢春分以後鮮有不過辰初  
秋分以後鮮有不過辰正然則自今宰臣常不至文德  
殿押班請春分辰正秋分已初奏事未畢卽如今詔庶  
幾此禮不至遂廢迺詔春秋分率以辰正熙寧六年正  
月西上閣門副使張誠一言垂拱殿常朝先內侍唱內  
侍都知以下至宿衛行門計二十八班起居後通事舍  
人引宰執樞密使以下大班入次親王次侍衛馬步軍  
都指揮以下次皇親使相以下十班入方引見謝辭或  
過百官起居日自行門後通事舍人引樞密以下次親  
王使相以下至刺史十班入方奏兩巡使起居立定方

引兩省官入次閣門引宰臣以下大班入起居畢候百  
官出絕兩省班出次兩巡使出中書樞密方奏事已是  
日高況大班本不分別丞郎給諫臺省及常參官今獨  
使相以下曲爲分別虛占時刻請遇垂拱殿百官起居  
日將親王以下十班合爲四班親王爲一班侍衛馬步  
軍都指揮使爲一班皇親使相以下至刺史重行異位  
爲兩班可減六班如垂拱殿常朝不係百官起居或紫  
宸殿百官起居其親王使相以下班並依舊儀序入起  
居從之九月引進使李端慤言近朔望御文德殿視朝  
祁寒盛暑數煩清蹕而紫宸之朝歲中罕御請朔日御

文德既望坐紫宸庶幾正衙內殿朝儀並舉從之元豐八年二月詔諸三省御史臺寺監長貳開封府推判官六參職事官赤縣丞以上寄祿升朝官在京釐務者望參不釐務者朔參哲宗元祐四年十月以戶部尚書呂公孺言詔朔參官兼赴望參望參官兼赴六參五年詔權侍郎並日參紹聖四年十月御史臺言外任官到闕朝見訖並令赴朔望參尋又言元豐官制朔參班序有日參六參望參朔參已著爲令元祐中改朔參兼赴望參望參兼赴六參有失先朝分別等差之意止依元豐儀令從之政和詳定五禮新儀有文德殿月朔視朝儀

紫宸殿望參儀垂拱殿四參儀紫宸殿日參儀垂拱殿

日參儀崇政殿再坐儀崇政殿假日起居儀其文不載

中興仍舊制乾道二年九月閣門奏垂拱殿四參

宰執侍從武臣止任文臣皇帝坐先讀奏日知閣以下

次御帶環衛官以下次忠佐殿前都指揮使以下次殿

前司員僚次皇太子次行門已上逐班並常起居次樞

密學士待制樞密都承旨以下知閣并祗應武功大夫

以下通班常起居次親王次馬步軍都指揮使次使相

次馬步軍員僚已上逐班並常起居次殿中侍御史入

側宣大起居訖歸侍立位次宰執以下並兩省官文臣

百官入相向立定通班面北立大起居訖

凡常起居兩拜大起居七

三省升殿侍立次兩省官出次殿中侍御史對揖出

三省樞密院奏事次引見謝辭次引臣僚奏事訖皇帝

起詔今後遇四參日分起居班次可移殿中侍御史及

宰執以下百官班令次樞密以下班起居却令親王并

殿前都指揮使以下殿前司員僚逐班於宰執以下班

後起居餘並從之淳熙七年九月詔自今垂拱殿日參

宰臣特免宣名嘉定十一年正月臣僚奏竊見皇帝御

正殿或御後殿固可間舉四參官亦有定日近者每日

改常朝為後殿四參之禮亦多不講正殿後殿四參間

免陛下臨朝之日固未嘗輟而外廷不知聖意或謂姑

從間便非所以肅百執事也常朝之禮止於從臣後殿

之儀從臣不與四參止及卿郎而乃累月僅或一舉恐

尺天威踈簡至此非所以尊君上而勵百辟也伏願陛

下嚴常朝後殿四參之禮起羣下肅謹之心彰明時厲

精之治豈不偉哉從之初羣臣見辭謝皆赴正衙淳化

二年知雜御史張郁言正衙之設謂之外朝凡羣臣辭

見及謝先詣正衙見訖御史臺具官位姓名以報閣門

方許入對此國家舊制也自乾德後始詔先赴中謝後

刺史閤門通事舍人以上新授者亦赴正衙辭謝出使  
急速免衙辭者亦具狀報臺違者罰奉一月其內諸司  
職官并將校至刺史以上新授者欲望同百官例赴正  
衙謝從之元豐既定朝參之制侍御史知雜事蕭中行  
上言文德正衙之制尚有當朝之虛名襲橫行之謬例  
有司失於申請未能釐正兩省臺官文武百官赴文德  
殿東西相向對立宰臣一員押班聞傳不坐則再拜而  
退謂之常朝遇休假併三日以上應內殿起居官畢集  
謂之橫行自宰臣親王以下應見謝辭者皆先赴文德  
殿謂之過正衙然在京整廛務之官例以別敕免參宰臣  
押班近年已罷而武班諸衙本朝又不常置故今之赴  
常朝者獨御史臺官與審官待次階官而已今垂拱內  
殿宰臣以下既已日參而文德常朝仍復不廢舛謬倒  
置莫此爲甚至於橫行參假與夫見謝辭官先過正衙  
雖沿唐之故事然必俟天子御殿之日行之可也詔下  
詳定官制所言今天子日聽政於垂拱以接執政官及  
內朝之臣而更於別殿宣敕不坐實爲因習之誤兼有  
執事升朝官五日一起起居而未有執事者反謂之參  
疏數之節尤爲未當又辭見謝自己入見天子則前殿  
正衙對拜爲虛文其連遇朝假則百官司赴大起居不

當復有橫行參假宜如中行言於是常朝正衙橫行之儀俱罷

宋史卷一百十六終

